

# **AWIG-AWIG**

## **DESA ADAT SANGKANBUANA**



**KECAMATAN KLUNGKUNG  
KABUPATEN KLUNGKUNG  
PROVINSI BALI  
TAHUN 2024**

---

---

**AWIG-AWIG DESA ADAT SANGKANBUANA  
KECAMATAN KLUNGKUNG  
KABUPATEN KLUNGKUNG  
PROVINSI BALI**

**MURDA CITTA**

OM Swastyastu. OM Awighnam astu nama siddhām.

Antuk asung kreta waranugrahan Ida Sang Hyang Widhi Wasa, mlarapan antuk gilik-saguluk citta nirmala, Krama Desa Adat Sankanbuana prasida nyurat Awig-Awig sane kawastanin **Awig-Awig Désa Adat Sangkanbuana**, Kecamatan Klungkung, Kabupaten Klungkung, Provinsi Bali.

Awig-Awig puniki pinaka bungkahing pamikukuh, sepat siku-siku, sepat gantung, panuntun ngamargiang tata kuripan madésa adat ring Désa Adat Sangkanbuana. Awig-Awig puniki taler pinaka gagambelan midabdabin kalih nyagra kasukretan Désa Adat rauhing kulawarga pawongan, sané katawegin antuk dharma prawertinnya ngrajegang Sang Hyang Aji Agama mlarapan Tri Hita Karana miwah Dresta.

Pancasila, Panegara mawa tata, tata-titi miwah adnyanan sang rumaga Guru Wisésa nénten kalémpasin olih Awig-Awig puniki. Mogi-mogi mlarapan Awig-Awig puniki Krama Desa Adat Sangkanbuana mikolihang kaparipurna kuripan manut patitis.

OM Santih, Santih, Santih OM.

Sangkanbuana, 11 Januari 2024

Olih,

Krama Desa Adat Sangkanbuana

**SARGAH I  
ARAN, WEWIDANGAN, TIPE, MIWAH STATUS DÉSA ADAT**

Pawos 1

1. Désa Adat puniki mawasta Désa Adat Sangkanbuana, Kecamatan Klungkung, Kabupaten Klungkung, Provinsi Bali.
2. Desa Adat Sangkanbuana sampun kasurat ring lepihan Peraturan Daerah Provinsi Bali Nomor 4 Tahun 2019 tentang Désa Adat di Bali *nomor* 1385.

Pawos 2

Désa Adat Sangkanbuana ngawawa kalih banjar adat, inggih punika:

1. Banjar Adat Sangkanbuana;
2. Banjar Adat Pegending.

Pawos 3

Wewidangan Désa Adat Sangkanbuana kawatesin nyatur, inggih punika:

1. sisi kangin : Tepi Kauh Pangkung utawi Simpang Lima;
2. sisi kelod : Tepi Kaler Desa Adat Budaga;
3. sisi kauh : Tukad Jinah;
4. sisi kaler : Badugul Subak Besang Pagending

Pawos 4

Désa Adat Sangkanbuana ngranjing tipe Désa Adat Anyar.

Pawos 5

Désa Adat Sangkanbuana kawawa Provinsi Bali tur pinaka *subjek hukum* sajeroning *sistem pemerintahan* Provinsi Bali.

**SARGAH II  
PAMIKUKUH MIWAH PATITIS DÉSA ADAT**

Pawos 6

1. Désa Adat Sangkanbuana ngamanggehang pamikukuh:
  - ha. Pancasila;
  - na. Panegara Mawatata;
  - ca. Trihita Karana manut tatwaning Buwana Agung; miyah;
  - ra. Ilikita utawi uger-uger sané mapaiketan Désa Adat.

Pawos 7

2. Désa Adat Sangkanbuana ngamanggehang patitis:
  - ha. ngukuhang miyah ngrajegang Sang Hyang Agama;
  - na. nginggilang tata prawertin magama Hindu manut Dresta;
  - ca. ngrajegang kasukretan Désa Adat miyah Krama Désa Adat, sakala-niskala.

**SARGAH III**  
**AWIG-AWIG, PARAREM, MIWAH PERATURAN LAIN DÉSA ADAT**

**Palet 1**  
**Indik Awig-Awig Désa Adat**

Pawos 8

1. Désa Adat Sangkanbuana wenang nyuratang Awig-Awig Désa Adat Sangkanbuana, Kecamatan Klungkung , Kabupaten Klungkung, Provinsi Bali
2. Awig-Awig Désa Adat Sangkanbuana kasurat oih Sabha Désa Adat, Kerta Désa Adat, Prajuru Désa Adat, Prajuru Banjar Adat, kasarengin oih utusan sané patut.
3. Awig-Awig sané kasurat patut nginutin uger-uger panyuratan Awig-Awig manut kaputusan Pasamuan Agung II Majelis Désa Adat Bali tahun 2021.
4. Awig-Awig sané sampun kasurat patut kasobyahang jeroning Paruman Désa Adat Sangkanbuana.
5. Awig-Awig sane kasobyahang patut ngamolihang cacumpon mlarapan saseleh Majelis Désa Adat (MDA) Provinsi Bali kalih kakukuhang jeroning Paruman Désa Adat Sangkanbuana.
6. Awig-Awig sané sampun kasurat tur sampun kakukuhang jeroning paruman patut kawigunaang ngantos sadurung kagentosin mlarapan kaputusan paruman sané molihang cacumpon tur kakukuhang.
7. Awig-Awig sané sampun molihang cacumpon MDA Provinsi Bali, miyah kakukuhang jeroning Paruman Désa Adat Sangkanbuana patut ka-*daftar-ang* ka Dinas Pemajuan Masyarakat Adat Provinsi Bali.

**Palet 2**  
**Indik Pararem Désa Adat**

Pawos 9

1. Pararem inggih punika uger-uger utawi kaputusan Paruman Désa Adat Sangkanbuana pinaka pamargin Awig-Awig utawi pidabdab anyar miyah/utawi nyenarang wicara adat utawi pikobet Désa Adat Sangkanbuana.
2. Désa Adat Sangkanbuana wenang nyuratang Pararem-pararem minakadi:
  - ha. Pararem Panyacah: Pararem sane kakaryanin tur kaanggén ngamargiang Awig-Awig;
  - na. Pararem Pangelé: Pararem niri utawi nyéjé sane kaanggén nabdabin sané durung kawilangin sajeroning Awig-Awig;
  - ca. Pararem Panepas Wicara: Pararem sané kakaryanin tur kaanggén tata-titi nepas wicara inggihan manut Awig-Awig utawi manut kawéntenan.
3. Pararem kasurat manut pabuat tur kakaryanin oih angga Sabha Désa, Prajuru Désa Adat mwang Banjar Adat, rauhing utusan Krama.

4. Daging Pararem patut nganutin daging Awig-Awig utawi ilikita sané mamargi, tur nénten matinjakan antuk ilikita-ilikita Panegara Republik Indonesia.
5. Pararem kawigunaang jantos sadurung kagentosin antuk Pararem anyar sane kasobyahang tur kakukuhang jeroning Paruman Désa Adat Sangkanbuana.
6. Pararem patut ka-*daftar*-ang ka Dinas Pemajuan Masyarakat Adat Provinsi Bali.

**Palet 3**  
**Indik Peraturan Lain Désa Adat**

**Pawos 10**

Sahananing pabuat sané durung kaingkup olah Awig-Awig miwah Pararem Désa Adat Sangkanbuana wenang kakaryanang tur kasuratang antuk *Peraturan Lain Désa Adat*, minakadi Pasuara, Kaputusan Prajuru Désa Adat.

## **SARGA IV** **SUKRETA TATA PARAHYANGAN**

### **Palet 1** **Dewa Yadnya**

#### **Pawos 11**

1. Pura Kahyangan Desa Adat Sangkanbuana lan pujawalin nyane, inggih punika :
  - ha. Pura Kahyangan Tiga Desa :
    - 1) Pura Pucak :
      - Pujawali Alit : Saniscara Kliwon Landep lan Wayang
      - Pujawali Ageng : Radite Wage Kuningan
      - Ngusaba Desa, Ngusaba Nini : Purnama Kapat
    - 2) Pura Puseh ingkup Pura Luhuring Akasa : Saniscara Kliwon Kuningan
    - 3) Pura Dalem Setra lan Prajapati : Anggara Kliwon Medangsia
    - 4) Pura Dalem Penghulu : Buda Umanis Medangsia
  - na. Pura Kahyangan Desa:
    - 1) Pura Pasar Agung : Anggara Kliwon Tambir
    - 2) Pura Bangun Sakti : Sukra Paing Gumbreg
    - 3) Pura Taman Rsi Tapak Meles : Sukra Paing Gumbreg
    - 4) Pura Kalang Anyar : Soma Paing Langkir
    - 5) Palinggih Mas Istri Ayu : Pamargi yadnya mapaiketan rikala pujawali ring Pura Pucak
    - 6) Palinggih Bulang Tamba : Pamargi yadnya mapaiketan rikala pujawali ring Pura Pucak nepek Tumpek Landep
2. Palelastian mapaiketan Ngusaba Desa ka segara kamargiang ngalimang warsa
3. Satunggil Ngusaba Desa prade nenten ka segara, pasucian kamargiang ring Bathara Tirta Campuhan Tukad Jinah.
4. Satunggil Ngusaba Desa rikala madaging malasti ka segara, soang-soang krama patut nanceb penjor upakara manut paridabdbab.
5. Satunggil Ngusaba Desa nenten madaging malasti ka segara, penjor wantah katanjebang ring soang-soang parahyangan desa
6. Sahananing Pamargi Yadnya ring Pura Kahyangan Tiga Desa lan Pura Desa kapuput olih Siwa Desa
7. Soang-soang Pura Kahyangan Tiga Desa lan Pura Kahyangan Desa Adat Sangkanbuana kaprebea olih krama desa adat.

#### **Pawos 12** **Pura Luhuring Akasa**

1. Pura Luhuring Akasa wenten sakuwub wawidangan Pura Puseh;
2. Pura Luhuring Akasa karajegin olih Mangku Gede Edi Hartawan rauh kalanturan kapatutan
3. Pujawali Pura Luhuring Akasa nepek sapisanan Pujawali Pura Puseh

4. Satunggil Pujawali wawantenan tegteg kasayagaan olih sang pangrajeg
5. Satunggil pawangi tegteg kasanggra olih sang pangrajeg
6. Rikala wenten palelastian, Pangusaban Desa, Ngusaba Nini ring Pura Pucak, Ida Sasuhunan ring Pura Luhuring Akasa taler masarengan sareng Ida Sasuhunan Pura Kahyangan Tiga Desa lan Kahyangan Desa
7. Panyimpenan Pralinggan Ida Sasuhunan Pura Luhuring Akasa masikian jeroning Panyimpenan ring Pura Puseh

Pawos 13

1. Aturan marupa atos, punia, piranti uparengga miwah sekeluirnia patut kedruwe olih Desa Adat, kasuratang olih prajuru desa adat.
2. Krama rikala nangun yadnya tur muatang tatangguran manut pabuat, patut ngutamayang tatangguran duwe desa adat.

Pawos 14

Kasukertan Kahyangan :

1. Krama Desa Adat Sangkanbuana utawi pamedek patut ngupadi kasukertan kalih kasucion kahyangan;
2. Sane tan kalugra ngranjing ka pura inggih punika:
  - ha. Sang sebel ring raga;
  - na. Cuntaka.
  - ca. Nganten durung mabaya kawonan
  - ra. Ubuuh-ubuhan sajabaning mapaketan upakara;
  - ka. Sang mabusana sane tan patut manut tata susila ngranjing ka Pura;
  - da. Makta sahanan barang sane sinanggeh leteh manut agama;
  - ta. Sahanan sane tan kapatutang manut pararem utawi sane kabaos ngletehin.
3. Pratingkah sane tan kapatutang ring Pura:
  - ha. Masumpah utawi naap cor;
  - na. Maujar ala, ulah ala, wak parusi, nemah utawi misuh;
  - ca. Miyegan;
  - ra. Ngagah wastra, pusungan miwah macecepin rare;
  - ka. Makoratan, mabanyu, makolem lanang istri masarengan dados asiki, macumbana matemu rasa, masanggama miwah sakancannia sane siosan;
  - da. Mangan nginum rauh ketaluan, sehananing jajudian, ngelanjar.
4. Ngagah wastra, utawi pusungan jeroning wawidangan pura kangkat majeng sang sulinggih, pragina sane pacang ngayah;
5. Krama utawi pamedek mabukti ngaletehin wenang kadanda;
6. Kahyangan sane keni kedurmanggalaan makadi panca kerubuhan, kesiratan rah jadma, kehanan wangke sato ageng, wangkening manusa, sehananing lulut lan simbar, mangku utawi sang sane ngemanggihin digelis nyadokang majeng Prajuru, mangda marumang krama Desa adat, pacang ngawentenang pangupakara sepatutnya, manut panugrahan Ida Sulinggih;
7. Krama Desa Adat karawuhan ngawinang kasinangkawonan digelis kapintonin manut pararem tan ngalempasin sastra lan agama.

**Pawos 15**  
**Indik Mangku**

1. Soang-soang Pura sawewengkoning Desa Adat Sangkanbuana, kengin kaadegang mangku.
2. Tata ngadegang mangku :
  - ha. Lanturan keturunan mangku, tur katuku keluarga lan kasumangkemin krama desa;
  - na. Prade nenten wenten saking keturunan, wenang nunas bawos ring natar pura;
  - ca. Prade nenten polih saking nunas bawos, kamargiang sasudian desa majeng krama desa;
  - ra. Prade nenten polih antuk nunas bawos, kangkat antuk lekesan tur molihang pasumangkeman desa;
  - ka. Kawintenin olih Ida Siwa Desa tur kaupasaksi prajuru rauh krama desa;
  - da. Rikala Mangku sampun seda, pangeladan mangku kamargiang olih Jro mangku, pamuput seosan kengin olih Sulinggih.

**Pawos 16**  
**Undagan swadarma Pamangku**

1. Mangku Pamucuk/Pangarep inggih punika mangku sane kawenang nganteb ring Pura kahyangan desa utawi Pura Kahyangan Tiga Desa satunggil ngamargiang Yadnya
2. Mangku Pangabih inggih punika mangku-mangku sane kasudi olih krama jeroning paruman. Mangku puniki maswadarma ngawantu mangku pamucuk/pangarep rikala ngias , nedunang, ngalinggihang utawi manut pabuat.
3. Mangku pangayah inggih punika mangku paibon sane kasudi jeroning paruman maswadarma ngayah ngrauhang tirta panglukatan, wangsuh pada, utawi ngamargiang eteh-eteh pangreresikan utawi manut kawentenan
4. Mangku ulun setra inggih punika mangku sane kasudi jeroning paruman mangda ngamongin ring Ulun Setra rikala wenten muatang pamargi yadnya ring Ulun Setra

**Pawos 17**

1. Krama sane tan kangkat kaadegang mangku :
  - ha. sang cadangga
  - na. mabukti salah laku
  - ca. nenten molihang kasumanggeman krama desa
2. Sang kaadegang mangku Pura risampun ngamargiang pawintenan weweg, sayaga ngamargiang swadarma kapamangkuuan ;
3. Mangku ngamargiang amongan swadarma, kawantu olih mangku pangabih, prajuru, lan krama.

Pawos 18

Swadarma Mangku

1. Ngutamayang ngamargiang swadarma kapamangkuan;
2. Nabdabin pamargin upakara lan upacara kaadungan majeng prajuru desa;
3. Sayaga ngrombo pamargin mangku siosan manut pabuat lan kawenangan;
4. Sayaga manados tatuladan krama desa;
5. Tureksa jeroning pura tur sayaga ngrauhang majeng prajuru;
6. Nuntun krama desa mangda satinut dresta.

Pawos 19

1. Mangku Pamucuk/Pangarep Pura patut polih pangrombo mangku-mangku siosan.
2. Mangku pamucuk/Pangarep keni piambeng patut kagentosin manut kabuatang
3. Mangku keni ujar ala utawi ulah ala patut maprayascita, sang ngeninin kadanda manut pararem;
4. Mangku macihna amungpang paraning laku, nyasar sesana, kararianang manados mangku kacihna ngawaliang pawintenan.

Pawos 20

Olih-olihan mangku luwirnia :

1. Kaping singgih;
2. Polih pahan sesari sane kapupulan sakeng bakti sakesidan;
3. Polih busana arangsukan satunggil wali ageng utawi kaanutan manut kawentenan;
4. Polih petiyas siwosan saking aturan krama manut pararem;
5. Luput sahanan papeson marupa rarampen, raramon, sajabanin cacingkreman lan patus jinah rauh panyilidihin nyane;
6. Pawintenan lan pangeladan mangku pamucuk/pangarep kasanggra desa adat, pelebon kaprebeya lan kamargiang olih Desa Adat, malarapan piadung masarengan sang kapatutan.
7. Mangku pangabih luput papeson, ayah-ayah krama, sane seosan mamargi kadi patut
8. Mangku pangabih seda polih jinah apengarga 100 kg beras mapewewehe kasa putih kuning kalih gulung, pakaryan kasanggra pasemetongan.
9. Mangku pangabih polih pah-pahan sasari sane kaparidabdab olih prajuru
10. Sajabaning mangku pamucuk/pangarep seda kangkat kapendem utawi kageseng manut kawentenan

Pawos 21

1. Mangku kagentosin, sangkaning:
  - ha. seda;
  - na. sungkan rahat;
  - ca. pinunas tur sampun polih uwak-uwakan;
  - ra. kanorayang.
2. Mangku sane kanorayang kadanda tur ngawaliang pawintenan;

3. Mangku ngalap rabi sangkaning rahayu, rahayu katampenin, prade lempas patut kadanda;
4. Mangku kaambil rabi, patut kaselehin tur pamutus pamargi kaanutan antuk daging saseleh;
5. Mangku sane ngarepang yadnya atiwa-tiwa patut ngamargiang pajaya-jayan.

**Palet 2  
Rsi Yadnya**

**Pawos 22**

1. Krama mapikarsa nyujur padwijatian, patut ngarauhang pisadok majeng Bandesa utawi prajuru Desa Adat Sangkanbuana;
2. Bandesa utawi prajuru desa adat patut ngadungang paridabdab pamargi nyujur padwijatian;
3. Krama risampun madwijati patut nginutin sadaging awig-awig lan dresta, prade piwal kabawosin jeroning paruman;
4. Sang pacang madwijati patut nampenin diksa pariksa sapatuta.
5. Prajuru patut nitenin/nureksain laksana sang pacang mapodgala, mangda tan lempas kecapping Agama;
6. Sang madwijati lempas kecapping agama, prajuru wenang tan ngeraremin;
7. Risampun puput upakarania tur naben Ida sampun mepica parab, prajuru patut ngawedar indik lan pamargin sang putus madwijati;

**Pawos 23**

1. Sang mewinten sane ngemargiang Nyonteng, Dalang, Ngusadain, patut masadok majeng prajuru, tur prajuru wenang ngawas, nitenin kewentenania, nyaksiang upakarania.
2. Prajuru wenang ngawedar tetujon pemargi sang melaksana, rauhing ring wates wewidangania;

**Pawos 24**

1. Bandesa lan Prajuru patut nuntun krama desa adat nyinggihang sang sampun mawinten, madwijati, lan sane patut kasinggihan;
2. Krama rikala nguntap, nuur, ngulem sang sampun mawinten, madwijati, lan sane patut kasinggihan karihinin atur pinunas rauh saruntutan nyane;
3. Krama sane nguntap, nuur, ngulem sang sampun mawinten, madwijati, lan jana sane patut kasinggihan, patut nginutin dresta Desa Adat Sangkanbuana;
4. Pamargi Adat, Agama, Budaya patut katunasang manut pabuat majeng sang sampun mawinten, madwijati, lan jana sane patut kasinggihan.
5. Krama Desa Adat Sangkanbuana kengin maturan, mapunia, ngamargiang darma paayah-ayahan majeng sang sampun mawinten, madwijati, lan jana sane patut kasinggihan manut pabuat.

**Palet 3  
Manusa Yadnya**

**Pawos 25**

1. Manusa yadnya inggih punika upacara/upakara darmaning manusa ngawit petemuning kama bang kama petak sejeroning garba wadaning ibu, jantos lampus riwekas;
2. Upacara/upakara Manusa Yadnya :
  - ha. magedong-gedongan;
  - na. kepus puser utawi lepas awon;
  - ca. tugtug kambuhan;
  - ra. telubulanan/asambutan;
  - ka. otonan;
  - da. makutang bok;
  - ta. raja singa/raja swala;
  - sa. matatah;
  - wa. masakapan;
  - la. mabayuh;
  - ma. mawinten
3. Upacara/upakara manusa yadnya mangda nganutin dresta Desa Adat Sangkanbuana utawi pituduh Ida Sulinggih sane kaangkenin Desa Adat Sangkanbuana.

**Palet 4  
Pitra Yadnya**

**Pawos 26**

1. Upakara pameretekan sang lampus kebawos Pitra Yadnya ;
2. Upacara pamretekaan sang lampus minekadi mersihin sawa, mendem, ngeseng sawa, atiwa-tiwa, kelanturang antuk pengororas, rauh ngelinggihang ring parahyangan Dewa Sang Bhata.
3. Pemargi mendem sawa utawi ngaben ring Desa Adat Sangkanbuana kadi ring sor :
  - ha. Krama Sane jenek ring desa, mendem utawi ngeseng, utawi ngaben magenah ring setra Desa Adat Sangkanbuana
  - na. Ngeseng kangkat kamargiang pinih lami 8 (kutus) sasih pacang kamargiang ngaben masa;
  - ca. Mendem utawi ngeseng kangkat ring genah ketah malarapan dasar piadung majeng bandesa utawi prajuru;
  - ra. Krama sane ngamargiang mendem utawi ngeseng ring dura desa:
    - 1) tanpa molihang swaran kulkul;
    - 2) tanpa molihan paayah-ayahan
    - 3) tan kacuntakaang olih krama desa
  - ka. Krama sane ngamargiang mendem utawi ngeseng ring dura desa kantun tegteg:

- 1) molihang daging patus malarapan arah olah kasinoman ;
  - 2) molihang tirta sane kabuatang
  - 3) molihang paayah-ayahan mangku manut pabuat
  - 4) ngaturang sasayut Guru Piduka prade pamargine nepek larangan wariga dresta
- da. Sang lampus wenten ring dura desa, sang maduwe kapatutan patut mapisadok lan nyantos pamutus daging piadung majeng bandesa utawi prajuru .
- ta. Sawa pacang kapendem tan kangkat kasekeh langkugan arahina.
- sa. Mendem utawi ngeseng nepek larangan padewasan manut wariga dresta, sang maduwe kapatutan patut ngaturang Sasayut Guru Piduka ring Prajapati.
- wa. Larangan padewasan mendem manut wariga dresta:

1) Dina

1	Prawani	7	Kala Gotongan
2	Purnama	8	Was Panganten
3	Tilem	9	Tarugan
4	Kajeng Kliwon	10	Pasah
5	Taliwangke	11	Anggarkasih
6	Semut Sadulur	12	Tumpek

2) Patemon Saptawara lan Wuku

1	Radite Landep	22	Buda Tolu
2	Radite Tolu	23	Buda Gumbreg
3	Radite Wariga	24	Waraspati Wariga
4	Radite Dunggulan	25	Waraspatii Warigadean
5	Radite Kuningan	26	Waraspati Julungwangi
6	Radite Krulut	27	Waraspati Dunggulan
7	Radite Uye	28	Waraspati Krulut
8	Radite Menail	29	Waraspati Merakih
9	Radite Wayang	30	Waraspati Tambir
10	Radite Dukut	31	Waraspati Medankungan
11	Soma Uye	32	Waraspati Matal
12	Soma Menail	33	Sukra Kuningan
13	Soma Prangbakat	34	Sukra Langkir
14	Soma Bala	35	Sukra Medangsia
15	Soma Ugu	36	Sukra Pujut
16	Anggara Sinta	37	Sukra Paang
17	Anggara Wayang	38	Saniscara Tolu
18	Anggara Klawu	39	Saniscara Dunggulan
19	Anggara Watugunung	40	Saniscara Krulut
20	Buda Ukir	41	Saniscara Matal
21	Buda Kulantir	42	Saniscara Dukut

---

- la. Puput ngamargiang mendem utawi ngeseng, rikala mawali budal, krama nunas pamrayascita rauh palukatan ring jaba sisi Pura Dalem.
4. Upakara pamendeman utawi pangesengan kambil malarapan sasana pitulung
5. Uparengga papaga, ancak, lan tali sategepne, miwah mangbang kasayagaang olih krama banjar adat kaduhkitan
6. Krama desa adat ngamedalin patus marupa jinah majeeg apengarga beras 1 kg, katampenin olih sang kapatutan sang lampus.
7. Sapamargi eedan nyayagaang uparengga rauh puput mendem utawi ngeseng, nenten wenten panyanggra panyangu,

#### Pawos 27

1. Krama sane lampus sadurung nedunang Ida Sasuhanan rikala eedan wali ring Kahyangan Desa, Dadia, utawi Paibon, mendem utawi ngeseng mamargi sapatuta.
2. Tigang rahina pacang pucak Ngusaba patut sampun nanceb penjor, ngawit puniki tan kadadosang mendem rauh nyineb prade wenten kalampusan.
3. Krama lampus nepek rahina nedunang Ida Sasuhanan rauh nyineb wali ring Kahyangan Desa, Dadia, utawi Paibon, mendem utawi ngeseng kamargiang risampun lintang arahina pamargin nyineb.
4. Sang lampus langkungang adiri nepek sami sayaga kapendem utawi kageseng patut masarengan ngamargiang sapula-pali ring setra utawi nenten kapatutang ngajangin
5. Seda nyambung risampun wenten mandem utawi ngeseng, mendem utawi ngeseng kamargiang benjangne utawi manut pabuat lan kawentenan
6. Krama lampus rikala wenten krama ngamargiang karya ayu, mendem utawi ngeseng kamargiang risampun puput ngamargiang pucak karya
7. Mangku paibon utawi mangku kahyangan desa seda, tan kangkat kapendem, pamargine patut kaplebonang, utawi kageseng.

#### Pawos 28

1. Sang lampus sangkanin salah pati, ulah pati, pamretekan nyane pateh makadi sang lampus biasa maweweh wawantenan pangulap lan pacaruan ring genah kalampusan utawi manut kawentenan;
  2. Sang lampus kantun ngadut bobotan kapendem risampun kaembasang bobotan nyane.
  3. Sang lampus sangkaning pinungkan katarka nularin, mangda nganutin pituduh sang wenang;
  4. Sang lampus sadurung embas utawi wawu embas patut kapendem nepek dina punika;
  5. Sang lampus ring genah tan patut, sang maduwe kapatutan patut maridabdabin genah kalampusan manut pituduh sang wenang
-

6. Tamiu lampus ring wawidangan Desa Adat Sangkanbuana patut kasukserahang majeng sang wenang.
7. Bandesa utawi prajuru patut ngrauhang peneges manjeng kapatutan tamiu lampus nganinin wenten tan wenten tategenan.

#### Pawos 29

Swadarmaning krama ritatkala katiben kelayuan :

1. Gelis mapisadok majeng Bandesa mangda molihang pamargi ngalantur;
2. Bandesa patut maritatas pemargin sang kelayuan manut kewentenania, tur ngarauhang dadauhan manut tatujon;
3. Krama patut ngremba sang kalayuan sane kadabdabin oih Bandesa;
4. Sarwa prateka nabdabin sawa patut kamargiang banban, sutrepti, kadulurin pangrastiti oih krama. Sang murug wenang kadanda manut daging sangkepan.

#### Pawos 30

1. Sawa sane dados kaabenang inggih punika sawa sane sanistane sampun mayusa apupak;
2. Sawa sane ring soring apupak kaupakara antuk :
  - ha. Ngwarak karuron : karuron durung marupa;
  - na. Nglangkir : sampun marupa durung embas sampun lampus;
  - ca. Nglungah : sampun embas tur durung ketus unto utawi durung apupak;
  - ra. Rupa upakara ring ajeng kapastika oih Ida Sulinggih ayat pasemetongan utawi sang anangun yadnya.

#### Pawos 31

Dudunan nangun yadnya atiwa-tiwa :

- ha. Paigum adung pangrencana oih sang aduwe karya sareng Bandesa;
- na. Mutusang adung pangrencana oih sang aduwe karya jeroning paruman;
- ca. Ngamargiang pangrencana manut daging pangrencana;
- ra. Ngarauhang pertanggungjawaban oih sang aduwe karya majeng krama;
- ka. Ngamargiang saseleh sajeroning nincapang pamargi salantur nyane.

#### Pawos 32

1. Atiwa-tiwa ring Desa Adat Sangkanbuana kangkat kamargiang antuk masa utawi nadak;
2. Atiwa-tiwa masa kamargiang nemuning sasih karo ngantos katiga manut kawentenan, antuk pakeling nenten kadadosang sawa kapendem langkungan limang (5) warsa;
3. Atiwa-tiwa masa kamargiang kinembulan ring Desa Adat Sangkanbuana sane kaajengin oih soang-soang banjar adat;
4. Rikala ngamargiang atiwa-tiwa masa kinembulan, nenten kadadosang ngamargiang niri;

5. Atiwa-tiwa niri kangkat kamargiang rikala dadakan.
6. Paayah-ayah krama rikala ngaben dadakan wantah makadi lampus kapendem.
7. Atiwa-tiwa niri dadakan tegteg kamargiang ring setra Desa Adat Sangkanbuana
8. Atiwa-tiwa dadakan tan kapantutang nyangling (ngebet sawa kapendem)
9. Sahananin pamargi atiwa-tiwa kaanutang manut kawentenan, paridabdab, lan pabuatan rikala punika tur nenten nglempasin dresta Desa Adat Sangkanbuana.
10. Mlaspas kajang rikala ngaben masa kamargiang ring Jaba Pura Dalem Setra;
11. Rikala ngamargiang ngaben masa polih tatangguran sapatutnya;
12. Sapula-pali upakara sane patut kapuput olih sulinggih, kapuputang olih Siwa Desa inggihan ngaben masa utawi dadakan;
13. Rikala ngaben masa , pasarean punika tan kapatutang langkungan kakalih.

#### Pawos 33

Rikala ngaben masa utawi dadakan nenten kadadosang ngarauhang panyanggra marupa lanjaran, sane seosan mamargi manut kawentenan.

#### Pawos 34

1. Pamargi krama rikala ngaben dadakan kadabdabin olih Bandesa;
2. Rikala atiwa-tiwa masa, pakaryan patuse kadi ring sor:
  - ha. Makarya uparengga lan upakara atiwa-tiwa;
  - na. Ngamong sapula-pali upakara;
  - ca. Ngawantu ngebet;
  - ra. Nabdabin tatakan api sategep nyane;
  - ka. Nyandang uparengga, eteh-eteh upakara ring puncak ngaben, ngantos puput nganyut;
  - da. Mangda sami eedan pamargi yadnya antar, eedan yadnya kadabdabin antuk paigum sang aduwe yadnya sareng prajuru banjar.
3. Tigang rahina risampun ngamargiang ngaben, sang nangun yadnya patut :
  - ha. Ngamargiang pacaruan:
    - (1) tengahing wawidangan setra genah ngebet lan ngeseng mamargi pancasata;
    - (2) ring jaba Pura Dalem, ekasata abrumbunan;
    - (3) ring rompok lan soang-soang bale banjar sane kaangge, ekasata abrumbunan;
    - (4) ring pempartan Pegending, ekasata brumbun;

#### Pawos 35

1. Sane patut molihang patus inggih punika krama banjar adat sane kaabenan tur kaupakarain ring Desa Adat Sangkanbuana;
2. Krama sane durung makedus untuk sasor nyane tan patut kadudukang patus;

Pawos 36

1. Krama sane cuntaka tan kadadosang ngamiletin parikrama suci;
2. Sang kahanan cuntaka :
  - ha. sebel raga : cuntaka ngantos puput tur kacihna sampun mabersih;
  - na. karuron : cuntaka ngantos 42 rahina, sane lanang 12 rahina;
  - ca. kalampusan : cuntaka krama ngantos wusan ngatelunin utawi mapegatan, sang kulakrama kaduhkitan (apekarangan utawi asong garba lanang) solas (11) rahina, rikala ngaben ngawit negtegang ngantos wusan macaru;
  - ra. nganten : cuntaka ngantos sampun mawidiwidana lan ngaturang pajati upasaksi ring padmasana uluning bale desa sane kapuput mangku desa;
  - ka. maduwe oka : sane istri cuntaka ngantos akambuhan, sane lanang cuntaka ngantos akepus pungsedan.
3. Sane tan keni lan tan ngenen cuntaka inggih punika krama sane sampun madwijati lan sane sampun maekajati manados Mangku sane kaadegang Desa Adat Sangkanbuana.
4. Sane tan keni cuntaka inggih punika Angga Sekaa Gong sajabaning angga inucap jeroning maduwe oka durung kepus pungsed utawi jeroning karang wenten kalampusan. .

Palet 5  
Bhuta Yadnya

Pawos 37

1. Bhuta yadnya inggih punika upacara-upacara pabiyakalaan ring ibu pertiwi lan kahyangan, sarwa prani miwah ring sarwa bhuta;
2. Upacara-upacara pabiyakalaan ring sarwa prani inggih punika :
  - ha. Upakara majeng entik-entikan utawi punyan-punyanan nemuning Tumpek Pengarah utawi tumpek Pengatag (Saniscara KliwonWariga);
  - na. Upacara majeng ubuh-ubuhan nemuning Tumpek Kandang (Saniscara Kliwon Uye).
3. Upacara-upacara pabiyakalaan ring Ibu Pertiwi miwah kahyangan lan ring sarwa bhutakawastanin macaru. Pecaruan inucap minakadi pacaruan :
  - ha. Ekasata;
  - na. Pancasata;
  - ca. Rsigana;
  - ra. Pancasanak;
  - ka. Pancakelud;
  - da. Balik sumpah;
  - ta. Tawur Agung utawi Malabuh Gentuh.

4. Pamargin Upacara pacaruan inucap ring ajeng (3) nganutin kecapping agama, pemargin nganutin dresta Desa Adat Sangkanbuana tur pamutus Ida Sulinggih sane kaangkenin Desa Adat Sangkanbuana.

### Pawos 38

Upacara Tawur Kesanga patut kelaksanayang kadi ring sor :

1. Ring soang-soang banjar Desa Adat Sangkanbuana kewentenang pecaruan Ekasata sane kamiletin olah krama banjar adat;
2. Ring soang-soang paumahan, nganutin tetiwak guru wisesa;
3. Nyoreang ngewentenang pengerupukan mebuu-buu, tur kapidabdab olah prajuru;
4. Ring rahina penyepian patut ngemargiang brata penyepian sekadi :
  - ha. Amati geni;
  - na. Amati karya;
  - ca. Amati lelungan;
  - ra. Amati lelangon;
5. Sane murug brata penyepian patut keni pamidanda manut perarem sejawaning sane polih lelugrahan manut wigunania, kekobetannia, saha lingga tangan prajuru;
6. Ring rahina pangembak geni, mapiteges pangelukatan bratha semadi, soang-soang krama patut nunas pengaksama ring kadangnia, lan makacihna pangawit dewasa Isaka Warsa;
7. Sehananing brata penyepian, sane ketitenin olah Prajuru patut kamargiang olah pecalang lan prajuru desa.

### Pawos 39

Nangluk Marana lan Ngider Buwana

1. Nangluk Marana lan Ngider Buwana kamargiang satunggil Kajeng Kliwon nyitan Sasih Kenem;
2. Ida Sasuhunan Pura Dalem tedun mider antuk eedan:
  - ha. Ida Sasuhunan Pura Dalem sakeng Pura Pucak nyujur Mandala Nista Pura Dalem Setra nodia pacaruan eka sata Biing rauh saruntutan nyane;
  - na. Puput manut aksara ha, Ida Sasuhunan nyujur ke Pura Dalem Pangulu nodia pacaruan eka sata Putih Kuning rauh saruntutan nyane
  - ca. Puput manut aksara na, Ida Sasuhunan nyujur ke Pura Puseh nodia pacaruan eka sata Selem rauh saruntutan nyane
  - ra. Puput manut aksara ca, Ida Sasuhunan nyujur ke Pempatan Agung nodia pacaruan eka sata Putih rauh saruntutan nyane
  - ka. Puput manut aksara ra, Ida Sasuhunan nyujur ke Pura Pucak nodia pacaruan eka sata Brumbun rauh saruntutan nyane
  - da. Puput manut aksara ka, Ida Sasuhunan masineb.

Pawos 40

Sasolahan Pangaci-aci

1. Nepek Buda Umanis Medangsia kamargiang sasolahan marupa abarong swarian miwah pacalonarangan magenah ring Jaba Pura Pucak;
2. Sasolahan abarong swarian kamargiang neren ping kalih, nepek kaping tigane kamargiang sasolahan pacalonarangan.
3. Pamundut utawi pangayah nyolahang katur majeng pamangku desa utawi krama sane kasudi tur sampun mawinten.
4. Sasolahan Wayang Wong kamargiang nemuning Saniscara Kliwon Kuningan lan pantaraning Pucak Ngusaba Desa lan Nyineb.
5. Sasolahan wawalian merupa pendet , wayang Gedog, topeng kamargiang nepek pucak wali utawi Ngusaba Desa manut dudonan.
6. Sasolahan wawalian marupa, nyraman, rejjang, daratan maprasawya rikala eedan panyineban wali.
7. Sasolahan wawalian marupa pendet, nyraman, rejjang, daratan maprasawya rikala eedan panyineban Ngusaba Desa.

**SARGAH V**  
**SUKRETA TATA PAWONGAN**

**Palet 1**  
**Indik Krama**

Pawos 41

1. Krama Desa Adat Sangkanbuana inggih punika sang sane kawawa olih Desa Adat Sangkanbuana;
2. Krama manut linggihnya kapah dados 3 (tigang) wilangan, inggih punika :
  - ha. Krama Désa Adat Sangkanbuana: Sang magama Hindu, sampun tedun mabanjar adat, mipil ring Désa Adat Sangkanbuana, tur sareng mikukuhin saha ngempon Pura Kahyangan, pawongan, mwang palemahan Désa Adat Sangkanbuana;
  - na. Krama Tamiu: Sang saking dura Désa Adat Sangkanbuana, magama Hindu, nénten mipil ring Désa Adat Sangkanbuana, majanten mipil ring Désa Adat tiosan ring Bali, tur sareng nyungkemin kasukretan miwah kasutreptian parahyangan, pawongan, mwang palemahan Désa Adat Sangkanbuana;
  - ca. Tamiu: Sang sane wantah sareng nyungkemin kasukretan miwah kasutreptian pawongan miwah palemahan Désa Adat Sangkanbuana.
3. Krama Désa Adat Sangkanbuana kawenanggang nguwubang utawi ngrobang kulawarganyane.

Pawos 42

Manut tategenan lan kawentenan pakulawargan, krama Desa Adat Sangkanbuana kabinayang manados:

- ha. **Krama Ngarep Jangkep:** krama sane kantun tegep lanang istri pakurenannia tur matetegenan weweg;
- na. **Krama Jada:** krama sane katinggal olih pajangkepan nyane tur tanpa angga kakuwuban, matetegenan ajadaan.
- ca. **Krama Balu Angkep:** krama balu sane kajangkepin olih angga kakuwuban beda jenis kelamin, tur matetegenan weweg, sajabaning sang nyangkepin kantun ngruruh pendidikan;
- ra. **Krama Bala Angkep:** anak-naking krama, lanang lan istri sampun antes ngamarginin ayah (mayusa 17 tahun) krama tur matetegenan weweg.
- ka. **Krama Sibakan:** krama sane maanga kakuwuban pateh jenis kelamin tur matetegenan sibakan;
- da. **Krama Tapukan:** anaking krama sane kantun alit utawi durung antes ngamarginin ayah-ayah krama tur lepas tategenan;
- ta. **Krama Melaga:** krama sane naur ayah-ayahan antuk wawilangan jinah. Krama sane kangkat mlagah;
  - (1) malinggih ring dura kabupaten utawi selat sagara rauhing angga kakuwuban nyane;

- (2) maduwe sameton tugelan sane sampun makrama turtunggal pakarangan ring wawidangan Desa Adat Sangkanbuana;
  - (3) sampun nahenin nyanggra puja wali; mapinunas mlaga ring paruman tur molihang wak-wakan.
- sa. **Krama Nyada:** krama sane sampun mayusa 65 salanturnya tur nenten maduwe angga kakuwuban sane sampun antes kamarginin ayah, lupiter ayah, nuku pamedalan jinah;
  - wa. Krama sane sampun nahenin makrama, salantur nyane tegteg kalanturan kapekraman nyane sajabaning camput utawi wusan makrama.

#### Pawos 43

Panemaya tedun makrama:

- 1. Krama tedun anyar mawit saking krama sane mawiwaha ka purusa;
- 2. Krama sane mawiwaha kapurusa tedun makrama wenten nyelidihi, wenten tedun pinaka krama anyar;
- 3. Krama sane kangkat nyelidihi inggih punika sane mawiwaha ka purusa pinih ajeng;
- 4. Krama sane mawiwaha kapurusa nyelidihi utawi tedun anyar, katedunang nepek nyanggra Pujawali Pura Kahyangan Tiga.
- 5. Desa Adat Sangkanbuana nampenin krama anyar sane mawit sakeng dura anaking krama.

#### Pawos 44

Krama wusan makrama desa adat majalaran antuk :

- 1. Puceh utawi ceput;
- 2. Pinunas ngraga tur sampun polih wak-wakan;
- 3. Kanorayang.
- 4. Magingsir agama

#### Pawos 45

- 1. Krama wusan makrama antuk pinunas ngraga tur molihang wak-wakan, risampune:
  - ha. Nyukserahang swalapatra pajanten raga nunas wusan makrama;
  - na. Nyukserahang swalapatra tan ninggal tategenang ring desa adat sane kaembasang oilih Bandesa adat;
  - ca. Nyukserahang swalapatra desa adat sane nampenin madesa adat utawi paguyuban manut kawentenan;
  - ra. Matur piuning malarapan pajati kaenter mangku ring pura desa;
  - ka. Nyukserahang swalapatra nenten nunas pah-pahan oilih-olihan desa adat.
- 2. Krama wusan makrama antuk pinunas ngraga tur molihang wak-wakan, prade mawali malih antes katampenin makrama antuk gaguat :
  - ha. Nyukserahang swalapatra sakeng bandesa utawi prajuru adat genah makrama;
  - na. Matur piuning malarapan pajati kaenter mangku ring pura desa;

- ca. Naur pangaad mara marupa beras 25 kg tur kangkat kawilangin antuk jinah.
- 3. Krama kanorayang prade mawali makrama, antes katampenin yening tegep nginutin ngaguat makadi :
  - ha. Nunas pangampura ring jeroning paruman;
  - na. Nyukserahang swalapatra nenten mabuat piwal;
  - ca. Naur panuku jalarang kakanorayang kawewehin menturin kas marupa jinah padruwen desa adat;
  - ra. Naur prabeya titian masa. Amasa kawilangin antuk beras 50 kg tur kangkat kawilangin untuk jinah;
  - ka. Maupasaksi malarapan pajati sane kaenter mangku ring pura desa.

Pawos 46

- 1. Swadarma tamiu:
  - ha. Mapisadok majeng prajuru tan kasep arahina;
  - na. Naur punia manut pararem;
  - ca. Nginutin kasukertan Desa Adat Sangkanbuana.
- 2. Swadikara tamiu :
  - ha. Polih pangayoman Desa Adat Sangkanbuana;
  - na. Polih ayah-ayahan manut pabuat.
- 3. Krama sane ngaraksa tamiu patut nadabin tamiu inucap mangda tan lempas uger-uger desa adat;
- 4. Tamiu sane piwal kategenang oilih krama sane ngaraksa tamiu inucap.

Pawos 47

- 1. Krama sane maduwe karya ayu utawi ala, kangkat nunas pitulung majeng krama utawi nyelang bale banjar pinaka genah makarya;
- 2. Krama sane maduwe karya ayu utawi ala, kadadosang nyelang bale banjar kemawon, upakara banjar kamargiang kadi patut;
- 3. Krama sane nyelang bale banjar pinaka genah makarya kakenin prabeya panukun listrik lan toya tur bale banjar mangda bersih;
- 4. Tamiu kangkat ngawigunaang bale banjar prade maduwe pakilitan pakulakraman, sakemawon patut naur pananjung batu marupa beras 5 kg arahina, listrik lan toya patut katanggung sang nyelang;
- 5. Bale banjar kautamayang kawigunaang oilih krama utawi krama sane mapinunas rihinan;
- 6. Nyelang lan ngawaliang genah patut saha uning Bandesa utawi prajuru desa.

Pawos 48

Tingkahing sane kepatutang sampun dados ngayahang desa :

- 1. Sampun alaki rabi ngantos mayusa 65 tiban;

2. Angga kakuwuban krama sane sampun katureksian olih Bandesa utawi prajuru desa;
3. Anak-anaking krama utawi angga kakuwuban sane dados ngayahang sampun mayusa 17 tiban.

Pawos 49

Saya Arah

1. Saya arah: krama sane polih amongan ngamargiang arah majeng krama
2. Saya arah akeh nyane kalih diri ngawit Wrapsati Umanis ngantos Buda Kliwon
3. Sane kasudi pinaka Saya Arah inggih punika krama jangkep marep sateos sane maduwe amongan Pamangku Pura Kahyangan Desa, Pamangku Pangabih, Prajuru Desa, Prajuru Banjar, Klian lan Angga Sekaa Gong, Klian Sekaa Saron, Klian Sekaa Angklung, Pacalang, Krama Tukang Sapuh, Petugas lampu, utawi krama sane kasudi ngamomongin pakaryan mabuat.

Pawos 50

1. Anak-anaking krama Desa Adat Sangkanbuana mangda mapendidikan sanistane saundagan Pendidikan Dasar;
2. Anak-anaking krama Desa Adat Sangkanbuana wenten pialang ngalanturang pendidikan dasar, desa adat patut ngutsahayang.

Pawos 51

1. Pajangkepan lan pakurenan mangda ngutsahayang maduwe oka ngantos wenten Ketut;
2. Wastan pungkusan lilitan oka mangda nganutin :
  - ha. Wayan, Putu, Gede;
  - na. Made, Kadek, Nengah;
  - ca. Nyoman, Komang;
  - ra. Ketut manut ririgan;

**Palet 2  
Indik Prajuru**

Pawos 52

1. Prajuru Desa Adat Sangkanbuana: Bandesa, Patajuh, Panyarikan, Patengen, soang-soang adiri;
2. Bandesa Adat: krama sane pinaka pucuking krama tur kaadegang jeroning paruman olih krama;
3. Patajuh, Panyarikan, lan Patengen, kasudi olih krama jeroning paruman;
4. Tata titining ngadegang Bandesa lan prajuru desa adat kadasarin antuk Pararem Panuntun Ngadegang Bandesa lan Prajuru Desa Adat Sangkanbuana;

5. Prajuru desa adat ngamargiang swadarma malarapan gilik-saguluk, paras paro sarpana ya;
6. Bandesa wenang nyudi staf administrasi umum lan administrasi keuangan manut pabuat;

#### Pawos 53

Gaguat dados Bandesa lan Prajuru Desa Adat wiadin Klian Banjar luwire :

1. Krama Jangkep Marep;
2. Kaadegang jeroning paruman;
3. Sanistane mapendidikan pendidikan dasar;
4. Sanistane mayusa telung dasa ngantos seket lima tahun;
5. Sadurung ngamargiang swadarma kaprajuruan, patut majaya-jaya lan kakukuhang;
6. Krama wantah dados ping kalih kaadegang bendesa utawi prajuru

#### Pawos 54

Swadarma Prajuru Desa Adat :

1. Ngarincikang sahananin paridabdab desa adat;
2. Ngarincikan Anggaran Pendapatan dan Belanja Desa Adat Sangkanbuana;
3. Ngalaksanayang pangrencana sane sampun kasungkemin ring jeronin paruman;
4. Nginutin awig-awig utawi pararem Desa Adat;
5. Nepasin sahanan wicara sane mapaiketan ring Desa Adat Sangkanbuana;
6. Maridabdabin sahananin parikrama pakraman lan agama, nganutin sastra agama miwah dresta;
7. Nyobyahang sahananin pamargin pakraman ring paruman utawi sangkepan;
8. Pinaka duta Desa Adat Sangkanbuana, utawi Banjar Adat Sangkanbuana pacang ngewentenang bebaos ring sapasiraugi manut pabuat.

#### Pawos 55

Wawenang Prajuru Desa Adat

1. Ngukuhang pangrencana sane kadabdabin olih Labda Pacingkreman Desa utawi LPD lan Bhaga Utsaha Padruwen Desa Adat utawi BUPDA;
2. Ngukuhang Rancangan Anggaran Pendapatan dan Belanja Desa Adat utawi RAPBDA dados Anggaran Pendapatan dan Belanja Desa Adat utawi APBDA satunggil ngawarsa;
3. Ngawigunayang padruwen Desa Adat sajeroning ngamargiang swadarma prajuru;
4. Ngadegang lan ngararianang Pengawas, Pengurus LPD, BUPDA, lan Pacalang risampune kacumponin olih Sabha Desa;
5. Ngamargiang saseleh lan ngenterang sahananin parikrama Desa Adat;
6. Nibakang sahanan pamidanda manu tpamutus paruman;
7. Ngangganin Desa Adat sajeroning midabdabin parilaksana hukum;
8. Ngamargiang kawenangan siosan manut awig-awig lan pararem.

Pawos 56

Wewanengan lan ngentosin Prajuru Desa Adat :

1. Wawanengan makamiyah sengker dados Bandesa lan Prajuru Adat, luwire :
  - ha. Ngawit sakeng kakukuhang utawi majaya-jaya;
  - na. Masa ayahan mewaneng 5 warsa ngawit Purnama Kadasa;
  - ca. Risampun kalih sasih pacang tugtug sengker masa ayahan, kamargiang pangadegang antuk pararem panuntun ngadegang Bandesa lan prajuru desa adat Sangkanbuana;
  - ra. Sane wawu merarian dados wenang kacalonang malih;
  - ka. Sang pecak manados Bandesa utawi Klian Banjar dados kacalonang malih.
2. Ngentosin Bandesa lan Prajuru Desa Adat sangkaning :
  - ha. sampun tugtug sengker masa ayahan;
  - na. lampus utawi seda;
  - ca. tan prasida ngamargiang swadarman prajuru;
  - ra. saking pinunas ngraga tur sampun kalugra oih Krama Desa Adat ring jeroning paruman;
  - ka. kanorayang;
  - da. ngentosin prajuru patut kararemin oih krama, tur kawentenang pangilikita sane kasaksiang oih prajuru sane kapututang;
  - ta. Bandesa utawi prajuru sane ngentosin mawaneng ngantos masa ayahan Bandesa lan prajuru sane madeg;
  - sa. Ngamargiang ayah-ayah sapuput tugtug sengker

Pawos 57

Prajuru desa adat tan patut :

- ha. Mamurug awig-awig lan pararem;
- na. Ngardi kaputusan ngarugiang krama;
- ca. Iwang ngawigunayang swadarma lan wawenang;
- ra. Mabuat ngametuang biota;
- ka. Dados angga Pengurus Organisasi Terlarang;
- da. Merarian sedurung tutug sengker;

Pawos 58

1. Bandesa lan prajuru sane iwang sasana miyah ngalinyokang padruwen desa, piwal ring awig-awig, pararem utawi paswara tur sampun mabukti, patut kadanda nikel;
2. Bandesa lan Prajuru sane iwang manut (1) patut ngewaliang sehananing duwen Desa utawi Banjar, saha pramangkin kerarianang manados Bandesa utawi prajuru desa adat;
3. Pamargin pakrama katuntun oih prajuru siosan ring sane kararariangan.

Pawos 59

Petias Bandesa Adat miyah Prajuru Adat :

- ha. tan ngamedalin seluwiring jejahitan lan reramon;

- na. polih cenengan saluwiring duman apahan;
- ca. Bendesa, lan prajuru desa adat luput sahananin paturunan yadnya sajabaning cacingkreman lan patus

Pawos 60  
Pangelandan Prajuru

Krama sane nahenin manados Prajuru Desa, Prajuru Banjar, Klian Sekaa Gong, Klian Sekaa Angklung, Klian Saron, Klian Subak rauhing prajuru paibon, dadia, rikala pacang ngamarginin atiwa-tiwa patut karihinin upakara, upacara pangelandan antuk tata:

1. Sarauh sakeng ngulapin, jemek sane nahenin manados prajuru kadi ring ajeng katangkilang ring nista mandala Pura Pucak.
2. Malarapan wawantenan sapatuta sane katur ring wawidangan Pura Pucak, sawusan punika, jamek kalukat tirta sane katunas ring Pura Pucak.
3. Sawusan kalukat tirta, jemek mawali kagenah soang-soang manut linggih

Pawos 61

1. Sajeroning swadarma ngamargiang pangrencana pakraman, prajuru desa kaabih olih Angga Sabha Desa;
2. Sajeroning swadarma ngamargiang panepas wicara, prajuru desa kaabih olih Kertha Desa.

Pawos 62

1. Sabha Desa kasudi olih Bandesa, ring paruman Desa Adat makuweh sajeeg 9 diri;
2. Sabha Desa Adat mawiwit saking krama sane sujana lan Undagan Sabha Desa nganutin pararem;
3. Sabha Desa maweh darma tatimbang majeng prajuru desa mina kadi: ngarincikang daging awig-awig lan pararem, ngarencanaang wawangunan, ngarencanaang APBDA, lann gamargiang pawangunan desa;
4. Wawanengan sabha desa ingkup ring wawanengan masa ayahan Bandesa lan Prajuru desa.

Pawos 63

1. Kerta Desa kasudiolih Prajuru Desa Adat majeeg 9 diri;
2. Kerta Desa mawiwit saking prajuru desa, kawewehin antuk utusan krama sane maduwe kawagedan adat tur kasudi olih Bandesa. Bandesa Adat pinaka pamucuk sapisan angga Kerta Desa;
3. Yening pamucuk utawi angga Kerta Desa wenten paiketan nyane risajeroning wicara, pamucuk utawi angga inucap nenten kapatutang nepasin wicara;
4. Prade pamucuk Kerta Desa kawicaraang utawi wicara mapaiketan majeng pamucuk Kerta Desa, pamucuk Kerta Desa kagentosin olih angga sane mayusa pinih lingsir;
5. Wawanengan Kerta Desa ingkup ring wawanengan masa ayahan Prajuru desa.

#### Pawos 64

Swadarma Kerta Desa:

- ha. Nampenin, nureksain, nepasin wicara;
- na. Nepasin wicara mangdang utamayang kasukertan madasar antuk druwenang sareng-sareng;
- ca. Prade tan ngamolihang wiwit kadiak sarana, Kerta Desa nganutang manut daging awig-awig utawi pararem;
- ra. Prade sang keni nenten nagingin kantos waneng limolas (15) rahina, sang mawicara utawi para pihak kangkat ngarauhang majeng Majelis Desa Adat manut undagan.

#### Pawos 65

Prajuru desa, Sabha Desa, Kerta Desa patut polih olih-olihan manut pararem.

#### Pawos 66

Desa Adat Sangkanbuana maduwe makudang-kudang paiketan, minakadi:

- 1. Désa Adat Sangkanbuana madruwé makudang-kudang Paiketan, minakadi:
  - ha. Paiketan Pamangku;
  - na. Paiketan Sarati;
  - ca. Yowana Desa Adat
  - ra. Paiketan Wredha;
  - ka. Pacalang;
  - da. Paiketan Krama Istri; miwah
  - ta. Pasraman.
- 2. Paiketan Pamangku:
  - ha. Piketan Pamangku inggih punika pupulan Krama sané sampun katambyakan pinaka Pamangku;
  - na. Swadarma angga:
    - 1) kukuh ngamargiang dharma kapamangkuan;
    - 2) nincapang kaweruhan mwang kawagedan kapamangkuan; tur
    - 3) mautsaha manados panuntun pamargin agama miwah prasida manados tetuladan.
  - ca. Kaprajuruan miwah tata kramaning angga Paiketan Pamangku malarapan pasumangkeman angga paiketan pamangku;
- 3. Paiketan Sarati:
  - ha. Paiketan Sarati inggih punika pupulan krama sané sampun madruwé kaweruhan mwang kawagedan indik wewantenan tur sampun mawinten kaseratian;
  - na. Swadarma angga:
    - 1) ngukuhang wangun mwang pamargin wewantenan manut Sastra Dresta kaadungang antuk Dresta siosan;
    - 2). mautsaha pinaka panuntun satunggil parikrama ngamargiang upakara upacara manut pabuat.

- ca. Kaprajuruan miwah tata kramaning angga Paiketan Sarati malarapan pasumangkeman angga paiketan sarati;
- 4. Yowana Desa Adat:
  - ha. Yowana Desa Adat Sangkanbuana inggih punika pupulan anak-anaking krama sane sampun mayusa 15 tiban ngantos 30 tiban, tur durung marabian utawi munggah bacakan Banjar Adat;
  - na. Yowana Désa Adat: Banjar Adat Sangkanbuana mawasta Yowana Buana Putra, Banjar Adat Pegending mawasta Yowana Gita Buana.
  - ca. Yowana wawidangan Desa Adat Sangkanbuana kaenter olah Kliang Yowana tur karampih Patajuh, Panyarikan kalih diri, mwang Patengen kalih diri;
  - ra. Yowana wawidangan Désa Adat Sangkanbuana patut ngremba parikrama Krama Désa Adat Sangkanbuana manut linggih mwang sesanannyané tur nginutin pituduh Bandésa miwah Prajuru Désa Adat;
  - ka. Angga Yowana banjar adat Désa Adat Sangkanbuana mangda nyayagaang raga jeroning paajah-ajahan mwang pauruk-urukan sahananing swadharman Krama Désa Adat Sangkanbuana
  - da. Yowana BanjarAdat wenang makarya awig-awig Yowana Banjar Adat;
- 5. Paiketan Werdha:
  - ha. Paiketan Werdha inggih punika pupulan Krama utawi krama sané sampun mayusa 65 tiban utawi langkung;
  - na. Angga Paiketan Wredha kaaturin galah mwang genah nyagra kasegerogeran tur kaanggén genah nunas piteket;
  - ca. Paiketan Wredha kaparidabdab olah Prajuru desa adat;
- 6. Pasikian Pacalang:
  - ha. Pasikian Pacalang inggih punika pupulan Krama sané ngamargiang swadharma widang kasutreptian mwang kasukretan wewidangan Désa Adat rauh sadaging nyané, utawi rikala wenten parikrama desa adat ka dura wawidangan desa adat;
  - na. Angga Pasikian Pacalang patut :
    - 1) Kaadegang tur kararianang olah Bandésa madasar antuk kaputusan Paruman;
    - 2) Ngamargiang masa ayahan pateh masarengang masa ayahan Bandésa mwang Prajuru Désa Adat;
    - 3) Maswadharma nganutin tuntunan Sasana Pacalang sane kamedalang olah Majelis Désa Adat Bali;
    - 4) Setata sayaga ngamargiang swadharma negara manut titah Bandésa utawi Prajuru manut paletan;
    - 5) Ngamolihang aguron-guron saking Guru Wisésa anggén nincapang kaweruhan; saha;
    - 6) Ngamolihang swadikara olah-olihan manut Pararem.

7. Paiketan Krama Istri:
  - ha. Paiketan Krama Istri inggih punika pupulan istri krama lanang DésaAdat sané maswadharma ngrampih swadharma Krama lanang saha ngamargiang parikrama Désa Adat manut pabuat;
  - na. Prajuru Paiketan Krama Istri nginutin gagambelan kaprajuruan sang lanang;
  - ca. Prajuru Paiketan Krama Istri ingkup masarengang masa ayahan kaprajuruan lanang;
8. Pasraman:
  - ha. Pasraman inggih punika genah pangajah-ajahan utawi pauruk-urukan majeng krama nganinin tattwa, susila, mwang upacara tur parilaksanannyaé.

#### Pawos 67

Sekaa inggih punika pupulan krama sane kaadegang oih krama desa adat manut pabuat.  
Sekaa-sekaa ring Desa Adat Sangkanbuana :

- ha. Sekaa Saron;
- na. Sekaa Santhi;
- ca. Sekaa Angklung;
- ra. Sekaa Saron;
- ka. Sekaa-sekaa siosan mapaiketan adat, agama lan budaya manut pabuat.

#### Pawos 68

Sekaa Gong Desa Adat Sangkanbuana :

1. Angga sekaa Gong Desa Adat Sangkanbuana inggih punika krama sane kasudi pinaka angga sekaa Gong kapipilang oleh bendesa;
2. Swadarma sekaa Gong :
  - ha. Mautsaha waged nabuh;
  - na. Sayaga satunggil wenten pamargi sane muatang sekaa Gong;
  - ca. Sutrepti rikala ngamargiang swadarma;
  - ra. Inut sahananing ilikita sekaa Gong.
3. Swadikara angga sekaa Gong :
  - ha. Klian molihan peras Gong manut lilitan satunggil ngayah nabuh;
  - na. Polih panyanggra panyangu manut kawentenan;
  - ca. Nampenin kupahan: abalaganjurun utawi abarungan. Jinah kupahan 90% ke sekaa, 10% ke desa adat;
  - ka. Piranti Gong wenten kawon ( krawang, pelawah lan kendang) katanggung desa adat, sateos nyane katanggung sekaa;
  - da. molihang luputan ayah-ayahan desa adat sajabaning parum, molahan, patus,
4. Sekaa Gong Desa Adat Sangkanbuana, kamanggala oih kalih diri klian sekaa Saron;
5. Sekaa Gong Desa Adat Sangkanbuana, kapesengin Sekaa Gong Desa Adat Sangkanbuana.

Pawos 69

Sekaa Saron Desa Adat Sangkanbhuan :

1. Angga sekaa Saron Desa Adat Sangkanbuana inggih punika krama sane kasudi oih Bandesa .
2. Swadarma sekaa Saron :
  - ha. mautsaha waged nabuh Saron ;
  - na. sayaga satunggil wenten pamargi sane muatang Saron;
  - ca. sutrepti rikala ngamargiang swadarma;
  - ra. inut sahananing ilikita sekaa Saron.
3. Swadikara angga sekaa Saron :
  - ha. Klian molihan peras Saron manut lilitan satunggil ngayah;
  - na. Rikala pamargi katah wawantenan wantah marupa peras santun, rikala ngusaba utawi karya padgatakala peras santun ngempat saha runtutan nyane
  - ca. Polih panyanggra panyangu manut kawentenan;
  - ra. Nampenin kupahan, jinah kupahan 90% ke sekaa, 10% ke desa adat;
  - da. Piranti Saron wenten kawon ( krawang, pelawah lan kendang) katanggung desa adat, sateos nyane katanggung sekaa;
  - ta. Klian Sekaa Saron molihang luputan ayah-ayahan desa adat sajabaning parum, molahan, patus,
4. Sekaa Saron Desa Adat Sangkanbuana, kamanggala oih adiri klian sekaa Saron;
5. Sekaa Saron Desa Adat Sangkanbuana, kapesengin Sekaa Saron Desa Adat Sangkanbuana.

Pawos 70

Sekaa Angklung Desa Adat Sangkanbhuan :

1. Angga sekaa Angklung Desa Adat Sangkanbuana inggih punika krama sane kasudi oih Angga sekaa kapipilang oleh bendesa;
2. Swadarma sekaa Angklung :
  - ha. Mautsaha waged nabuh;
  - na. Sayaga satunggil wenten pamargi sane muatang sekaa Angklung;
  - ca. Sutrepti rikala ngamargiang swadarma;
  - ra. Inut sahananing ilikita sekaa Angklung.
3. Swadikara angga sekaa Angklung :
  - ha. Klian molihan peras Angklung manut lilitan satunggil ngayah nabuh;
  - na. Polih panyanggra panyangu manut kawentenan;
  - ca. Nampenin kupahan: abalaganjuran utawi abarungan. Jinah kupahan 90% ke sekaa, 10% ke desa adat;
  - ra. Piranti Angklung wenten kawon ( krawang, pelawah lan kendang) katanggung desa adat, sateos nyane katanggung sekaa;
  - ka. Molihang luputan ayah-ayahan desa adat sajabaning parum, molahan, patus,
4. Sekaa Angklung Desa Adat Sangkanbuana, kamanggala oih kalih diri klian sekaa Angklung;
5. Sekaa Angklung Desa Adat Sangkanbuana, kapesengin Sekaa Angklung Desa Adat Sangkanbuana.

**Pawos 71**

**Sekaa Santi**

1. Angga Sekaa Santi inggih punika krama sane oneng masanti kasudi oleh Klian Sekaa Santi lan kasumankemin oleh Desa Adat Sangkanbuana;
2. Sekaa Santi Desa Adat Sangkanbuana mawasta Seka Santi Gita Buana Winangun
3. Angga Sekaa Santi kasudi oleh pamucuk sekaa.
4. Swadarma angga:
  - ha. Mautsaha weruh lan waged masanti;
  - na. Tegteg nyagra kasusilaan sekaa;
  - ca. Manados tatuladan pamarisan suksaman sastra santi.
  - ra. Ngamargiang paundukan santi saluwiringgagitan (kidung, Gagyritan, palawakia, kakawin, lan sloka)
  - ka. Negepin sahanan upacara yadnya antuk gagitan manut kawentenan yadnya
  - da. Nagingin pangrereren antuk gagitan rikala wenten patirtan utawi piodalan Pura Kahyangan Tiga lan Pura Kahyangan Desa
  - ta. Nagingin kakidungan rikala pabersihan krama kalayusekaran
  - sa. Sayaga nagingin gagitan ring sahanan yadnya sane kamargiang krama mlarapan uleman
5. Swadikara :
  - ha. kangkat ngayah manut pinunas tur molihang wak-wakan oleh sang wenang;
  - na. kasayagaang wawantenan marupa pajati asoroh;
  - ca. polih panyangu manut kawentenan.

**Palet 3**  
**Indik Kulkul**

**Pawos 73**

1. Kulkul inggih punika piranti malakar taru sane sampun kacumponin pinaka tatengeran satunggil wenten parikrama pakraman;
2. Kulkul sane wenten ring wawidangan Desa Adat Sangkanbuana, minakadi:
  - ha. kulkul pura;
  - na. kulkul desa;
  - ca. kulkul banjar
  - ra. kulkul sekaa Gong;
  - ka. kulkul sekaa Angklung;
3. Kawigunan soang-soang kulkul:
  - ha. Kulkul Pura:
    - 1) Soang-soang pura kahyangan tiga lan kahyangan desa maduwe kulkul pura
    - 2) Kulkul Pura Pucak pinaka silih tunggil kahyangan desa kaswaraang kalih tuludan satunggil pacang ngamargiang yadnya pucak puja wali ring kahyangan tiga lan kahyangan desa.

- 3) sawusan swara kalih tuludan Kulkul Pura pucak, kulkul pura kaswaraang ngempang manut pamargi lan pabuat mapaiketan eedan yadnya ring pura inucap.

na. Kulkul Desa

- 1) Kulkul Desa magenah ring madya mandala Pura Pucak
- 2) Kulkul Desa kawigunaan rikala ngamargiang parikrama krama desa minekadi Paruman, Ngayah krama Desa, Pacingkreman, lan parikrama desa manut kawentenan miwah pabuat
- 3) Tabuh Tatepakan Kulkul Desa kalih tuludan sahananin pamargin parikrama desa

ca. Kulkul Banjar

- 1) Kulkul banjar wenten ring Banjar Adat Sangkanbuana lan Banjar Adat Pegending
- 2) Kulkul Banjar Adat manut angka (1) kawigunaang manut pabuat banjar adat
- 3) Tabuh Tatepakan Kulkul Banjar:
  - Atuludan banban cihna wenten kalayusekara
  - Atuludan bulus cihna wenten baya
  - Kalih tuludan cihna pacang Paruman, Ngayah krama Banjar, lan parikrama banjar manut kawentenan miwah pabuat

ra. Kulkul Sekaa kawigunaang manut pabuat sekaa tur kaswaraang kalih tuludan

**Pawos 73**

1. Kulkul patut katepak olih klian utawi sane katitah klian. Tatepakan nyane manut pabuat;
2. Krama sane katiben baya, sagelisne nunas pitulung, sepisanan nepak kulkul utawi kawantu olih sang sane nangehang kalnturan antuk saseleh.
3. Sang nepak kulkul piwal ring pamargi kawigunaan nepak kulkul, sang nepak patut kadanda manut pararem.

**Palet 4**  
**Indik Paruman**

**Pawos 74**

1. Paruman Agung Desa Adat Sangkanbuana inggih punika paruman sane kamiletin olih krama sasami krama, tur mawosang tata kasukertan pawongan rauh sadaging nyane;
2. Paruman Agung kamargiang satunggil Sasih Kasanga sadurung Rahina Ageng Nyepi, utawi prade wenten padgata kala, parum kamargiang karihinin antuk arah olih saya arah sangkanin pituduh Bandesa utawi prajuru desa;
3. Pasangkepan Desa Adat kamargiang padgata kala;

Pawos 75

1. Parikrama sane kainggilang ring Paruman desa inggih punika:
  - ha. Ngukuhang awig-awig;
  - na. Ngukuhang Bandesa lan Prajuru;
  - ca. Ngukuhang paridabdab mahautama pamargi pakraman.
2. Paridabdab mahautama madasar antuk Trihita Karana, minakadi:
  - ha. Nabdabin desa adat;
  - na. Ngarencana pawanganan desa;
  - ca. Ngamargiang paiketan pantaraning desa adat;
  - ra. Nabdabin padruwen desa adat;
  - ka. Mutusang paindikan rencana investasi ring desa adat;
  - da. Ngadegang lan nabdabin LPD;
  - ta. Nabdabin BUPDA;
  - sa. Nguwah-nguwuhin padruwen desa;
  - wa. Ngawangun sarana prasarana, adat istiadat, dharma agama, dresta, seni budaya;
  - la. Nincapang kaweruhang sajeroning pasraman;
  - ma. Ngawerdiang lan ngawigunayang indik asal-usul, nilai adat, nilai agama, nilai sima, nilai seni lan budaya, miwah sane seosan manut pabuat.
3. Prajuru desa sane nenten ngalaksanaang paruman desa manut uger-uger, paruman kengin kalaksanaang olih angga Sabha desa sane mayusa pinih anom lan pinih lingsir;
4. Putusan paruman desa ngiket krama desa.

Pawos 76

Sajeroning sangkepan, Bandesa utawi Prajuru Adat patut nambyakang :

- ha. Papeson munjuk lungsuring ayah-ayahan;
- na. Pamargin panelas arta brana druwen desa;
- ca. Pamargin utsaha-utsaha desa sane mabuatan;
- ra. Sahanan wicara lan pamutusnyane;
- ka. Daging paruman miwah pasuaran-pasuaran sane mabuatan;
- da. Pidabdab prajuru nganinin utsaha kertin desane kapungkur miwah sane sioasan;
- ta. Nambyakang sahanan dadauhan guru wisesa.

Pawos 77

Paruman utawi Pasangkepan sida mamargi prade :

1. Risampune sang ngayahang langkung ring satenga jeeg krama;
2. Karihinin antuk suaran kulkul;
3. Pamilet mabusana adat (madestar, makwaca makerag, makampuh, mawastra malalancingan);
4. Pamilet nenten makta gagawan;

5. Tan maren ngastiti Ida Bagawan Panyarikan macihna antuk ngarihinin ngaturang banten cane ring baduur meja sane kaaturang olih Jro Mangku;
6. Pabacakan pangrauh kamargiang ring nepek pangawit
7. Saking ngawit rauh puput sang ngayah patut malinggih trepti, sadurung katitah kangkat matangi, sang ngayah tegteg malinggih;
8. Sahanan pinaka pamutus mangda madasar antuk dasar tan piwal ring pamargi katah tur mawesana kabecikan;
9. Prade rikala mutusang babawos tan sida antuk puluk, kaputusan antuk paswaran pinih akeh;
10. Paruman utawi pasangkepan, sane ngangganin krama mipil nenten kangkat ngamedalang daging pikayun sajabaning mabuat olih paruman utawi sangkepan.

#### Pawos 78

Pamutus daging paruman utawi sangkepan kabawos rajeg risampuni kacumponin puluk utawi madasar paswaran sane akehan.

#### **Palet 5 Indik Padruwen Desa**

#### Pawos 79

Padruwen Desa Sangkanbuana, makadi ring sor:

- ha. Kahyangan Desa :
  - (1) Kahyangan Tiga (Pura Puseh, Pura Bale Agung, Pura Dalem lan Prajapati, Pura Dalem Pengulu);
  - (2) Pura Uluning Banjar;
  - (3) Pura Pasar Agung
  - (4) Pura Bangun Sakti.
  - (5) Pura Tapak Meles lan Taman Rsi
  - (6) Palinggih patunggalan Pura Pucak luwire Palinggih Mas Istri Ayu, Palinggih Bulang Tamba
  - (7) Pura Kalanganyar
- na. Gong, Angklung, lan Saron sejangkepnia;
- ca. Bale Desa, Bale Banjar rauhing telajakannia;
- ra. Tanah pakarangan Desa utawi tanah PKD, manut dresta sane sampun memargi kesukserahanang majeng krama Desa Adat Sangkanbuana tur setinut daging awig-awig;
- ka. Tanah setra;
- da. Tanah Laba Pura;
- ta. Labda Pacingkreman Desa utawi LPD;
- sa. Jinah kas banjar utawi desa;
- wa. Piranti Uperengga Pura Kahyangan;
- la. Kulkul;
- ma. CBD (Community Based Development)
- ga. Piranti siosan sane munggah ring ilikita Desa Adat salantur nyane.

Pawos 80

Olih-olihan Desa luire:

- ha. Olihan laba puradruwen desa;
- na. Paica-paica saking guru wisesa;
- ca. Urunan krama;
- ra. Dana punia, aturan-aturan siosan sane patut;
- ka. Sesarin canang;
- da. Cacukuh pahan laba utsaha desa.

Pawos 81

1. Prajuru patut ngenterang pamupon laba Pura lan druwen desa;
2. Pikolih lan pamupon laba Pura ngaranjing ring kas desa;
3. Tan kapatutang ngadol wiadin matiwakang druwen desa tanpa pamutus paruman utawi pasangkepan;
4. Sahanan druwen desa mangda mawali ring desa;
5. Sang ngaryanin tanah druwen desa lantur puput nyane kapuput ring jeroning pasangkepan;
6. Krama Adat Sangkanbuana patut nitenin tur mraktiyasain padruwen desa;
7. Sang mandung druwen desa prade mabukti keni denda manut pararem saha ngewaliang;
8. Pandung utawi maling sane tan sida kabuktiang sakala, desa adat patut ngawentenang padewasaksian manut kewentenan.

Pawos 82

Indik pamiara lan uger-uger ring setra :

1. Wawidangan setra patut kapiara olih krama;
2. Tanah pangurug lan gagumuk papendeman tan kangkat ngawigunayang sateos tanah setra;
3. Setra Desa tan kangkat kawigunayang olih krama dura desa sajabaning maduwe paiketan pasemetongan malarapan nginutin pararem;

**Palet 6**  
**Indik Pawiwahan**

Pawos 83

1. Pawiwahan inggil punika, paiketan anak lanang kalawan anak istri malarapan antuk adung tresna tur sampun tegep nampenin tri upasaksi (manusa saksi, butha saksi, widhi saksi) miyah kailikitaang manut ilikita guru wisesa;
2. Pidabdab pawiwahan ring Desa Adat Sangkanbuana, ngemanggehang kapurusana, sang purusa sane ngalap rabi tur kapaumahang ring sang kapurusa;
3. Rupa pawiwahan :
  - ha. pawiwahan lumrah : pawiwahan sang lanang rumaga purusa ;
  - na. pawiwahan nyantana/nyeburin : pawiwahan sang istri rumaga purusa.
  - ca. pawiwahan pada gelahang: pawiwahan sang lanang lan sang istri pinaka purusa lan pradana manut genah wit.

4. Paridabdab pawiwahan :
    - ha. **Pepadikan:** sangkulawarga purusa madarma suaka majeng sang kulakrama pradana antuk undagan:
      - 1) **nyedek:** sang pacang mawiwaha kapurusa kasarengin guru rupakan nyane matemuwirasa majeng sang pacang mawiwaha kapradana kasarengin guru rupakan nyane;
      - 2) **maplaku:** sang pacang mawiwaha kapurusa sane kasarengin guru rupakan nyane rauhing pasemetonan guru rupaka matemu wirasa majeng sang pacang mawiwaha kapradana kasarengin guru rupaka rauhing pasemetonan guru rupakan nyane
      - 3) **amet-pinet:** sang pacang mawiwaha kapurusa ngambil sang pacang mawiwaha kapradana sane katodia olih pasemetonan utawi krama tur kaupasaksi antuk triupasaksi.
    - na. **Ngerangkat :** sang purusa antuk sasiliban ngambil sang pradana tur salanturnyane, kulawarga sang purusa ngamargiang;
      - 1) **nyedek :** utusan sang kapurusa malarapan swalapatra pajanten sang mawiwaha masadu ajeng majeng guru rupaka sang kapradana, karampih olih manggala dinas kapradana ngrauhang adung babawos pamargi salantur nyane ;
      - 2) **maplaku :** pasemetonan sang kapurusa matemu wirasa majeng pasemetonan sang kapradana ngindikang pamargin pawiwahan ;
      - 3) **maupasaksi:** sang mawiwaha sane karampih olih pasemetonan sang kapurusa tur katodia manggala adat lan dinas matemu wirasa majeng pasemetonan lan manggala adat lan dinas pasemetonan kapradana.
    - ca. Sang purusa sane ngambil sang predana patut nyayagaan kalih peras pajati piranti nepak kulkul
    - ra. Pamuput babawosan, guru rupaka sang purusa patut ngrauhang penebas suaran kulkul Rp 250.000.00 majeng sang purusa sane mawit sakeng dura desa, Rp 50.000.00majeng sang purusa sane mawit jeroning desa adat Sangkanbuana.
    - ka. Cihna pamuput babawosan pawiwahan risampun kaupasaksi olih manggala adat lan dinas, sawatara galah jam pitu wengi patut kaswaraang kulkul banjar adat genah sang predana sane karihinin antuk ngaturang pajati olih Klian Banjar
    - da. Sahananing upakara sajeroning upacara pawiwahan sategep nyane patut katanggung sang purusa.
    - ta. Sahananing upakara, upacara kadasarin antuk piadung guru rupaka sang mawiwaha
    - sa. Krama purusa ngambil krama pradana Desa Adat Sangkanbuana patut ngrauhang pangenduh malarapan piadung sang guru rupaka pradana
    - wa. Pangenduh karauhang risampun molihang tatenger swaran kulkul
    - la. Pangenduh marupa beras akilo lan adeng ayam kalih bungkul
  5. Krama kapurusa prade ngambil kapradana seos agama pamargi kaanutang manut kawentenan, sudiwadani patut kamargiang sadurung ngamargiang pawiwahan.
  6. Krama kapradana prade kaambil olih seos agama tegteg ngamargiang pamargin adat/awig-awig.
-

**Pawos 84**

1. Sang kaicalan krama patut digelis masadok majeng klian, nunas pamitulung pacang maseserep.
2. Klian ngenterang pemarginé maseserep, tur mangda nganutin tata kramaning desa .
3. Paseserep patut sampun polih wakwakan prajuru.

**Pawos 85**

1. Krama mawiwaha kangkat ngamaduang prade malarapan pamargi rahayu tegteg molihang upasaksi bendesa utawi prajuru, prade lempas patut kadanda manut pararem ;
2. Krama sane mawiwaha tan rahayu utawi kantun kawicaraang, wicara patut kabuntasang, wawu molihang upasaksi ;
3. Jadma deha mobot, utawi sang majangkepan mobot keni cenidra, utawi sang balu luh mobot sadurung wenten ngangkenin patut digelis kadabdabin Bendesa, tur digelis karerehang pamunceh pamargi.

**Palet 7  
Indik Nyapihan**

**Pawos 86**

1. Sang palas merabian tur sampun kailikitaang kebawos nyapihan ;
2. Sang palas marabian yadiastun sampun kadabdabin olih kulawarga lan prajuru nenten sida masikian, dados nyapihan malarapan swalapatra pajanten kawewehin saha uning manggala adat lan dinas purusa pradana.
3. Nyapihan patut kamargiang ring genah pradana katampenin kulawarga pradana tegep prajuru adat lan dinas, tur karauhin oleh kulawarga sang purusa tegep manggala adat lan dinas
4. Sang nyapihan makarya swalapatra pajanten nyapihan kasahauningin olih manggala adat lan dinas purusa lan pradana
5. Swalapatra pajantenan nyapihan cihna piranti tatambyakan jeroning paruman tur katampenin jenar (sah).

**Pawos 87**

1. Sang nyapihan adung mawali alaki rabi utawi masomahan patut naur danda manut pararem, pamargi pawiwanan nginutin pawiwanan anyar ;
2. Sang nyapihan katangehan matemu wirasa kadanda manut pararem.

**Pawos 88**

1. Balu luh katinggal muanin nyane utawi balu sane pecak nyeburin, patut ngemargiang swadarma kadi ring sor :
  - ha. Ngemanggehang kepatibratan;
  - na. Ngemarginin ayah krama manut pamargi;
  - ca. Ngeraksa, nguasaang, lan miara warisan lan sentanan nyane;
  - ra. Dados ngadol warisan risapune polih wakwakan kulakraman sang lanang;

- ka. Kawenang mawiwaha sangkaning rahayu.
- 2. Balu tan pageh swadarma, luwire :
  - ha. Matingkah dretikrama, miwah salah solah sane siwosan;
  - na. Matilar tan pasadok;
  - ca. Lempas swadarmaning balu, utawi salah prawerti.
- 3. Balu tan pageh wenang katundung saha tan polih paahahan waris;
- 4. Balu tan pasentana, kawaliang olih kramania kapurusa, utawi sangkaning pinunas rahayu patut polih paahahan paguna kaya.

**Palet 8  
Indik Santana**

**Pawos 89**

- 1. Sentana inggih punika panglantur swadarma swadikara;
- 2. Sentana kepah manados :
  - ha. Preti sentana: katurunan buah basang sang makurenan;
  - na. Ssentana rajeg: anak istri rumaga purusa malarapan mawiwaha nyeburang
  - na. Sentana peperasan: panglantur swadarma lan swadikara pakurenan sangkaning ngidih manut paridabdab.

**Pawos 90**

Paridabdab meras sentana :

- 1. Sane patut kaperas anggen sentana:
  - ha. Sang keperas megama Hindu;
  - na. Sang kaperas sakeng waris pancer kapurusa;
  - ca. Mawiwit sakeng keluarga tunggal dadia;
  - ra. Sang sapa sira ugi yening tan wenten utawi tan polih paadung saking pancer kepurusa,
- 2. Paperasan sinanggeh puput, macihna :
  - ha. Sampun ngamargiang pawidhi-widhanaan paperasan;
  - na. Kaupasaksi manggala adat lan dinas, saha katambyakan jeroning paruman;
  - ca. Maduwe ilakita.

**Palet 9  
Indik Warisan**

**Pawos 91**

- 1. Warisan inggih punika tetamian arta brana, saha ayah-ayahan ngupadi sukerta sekala niskala saking kaluhuran marep ring turunannya;
- 2. Sane kaucap warisan luwire :
  - ha. Duwe tengah, karang paumahan, pemerajan;
  - na. Pegunakayan, tatadan, jiwadana, lan utang piutang.

3. Wawu kebawos waris, prade :
  - ha. Wenten sang mapiturun warisan;
  - na. Wenten turunannya, ahli waris;
  - ca. Wenten arta brana miwah tetegenan utawi ayah-ayahan merupa warisan.
4. Sane kebawos ahli waris, inggih punika :
  - ha. Preti sentana lanang;
  - na. Sentana rajeg;
  - ca. Sentana peperasan lanang utawi wadon.
5. Prade tan wenten sekadi ring ajeng, kang sinanggeh ahli waris :
  - ha. Turun purusa pernah ngunggahang, sekadi rerama dia, rerama dimisan, rerame dimindon;
  - na. Turun purusa pernah kesamping,mekadi ponakan, misan, mindon;
  - ca. Prade camput,tan wenten ngelingin, upakarania kemargiang olah krama.Druwennyane kaambil Desa.

#### Pawos 92

1. Swadarmaning ahli waris patut nerima saha ngusahayang tetamian ayah-ayahan saking keluhuranne mekadi ngerempon sanggah, Pura dadia, Pura kahyangan, saha pekarangannya;
2. Ngabenang sang ngewarisang saha ngelanturang upakara pitra yadnya sepatutnya;
3. Naurin utang-utang sang ngewarisang pamekas utang ring desa wiadin ring Pura lan utang-utang sane siwosan.

#### Pawos 93

1. Pengepahan warisan kangkat kemargiang sekadi sor :
  - ha. Risampun ngelaksanayang pitra yadnya lan utang piutang sang ngewarisang sampun buntas ketawur;
  - na. Warisan sangkaning arta brana paguna kayan kaepah pada;
  - ca. Karang ayahan desa kaemong antuk ahli waris kang sinanggeh pinih marep.
2. Sinalih tunggil ahli waris ring ajeng, tan polih pahpahan wewarisan prade ipun :
  - ha. Alpaka guru rupaka, utawi guru swadiyaya;
  - na. Merupa sentana rajeg, sane sampun kesah mewiwaha malih;
  - ca. Merupa sentana lanang, sane mewiwaha nyeburin kepekurenan lian.
3. Sentana ahli waris sane nilar Agama Hindu, keangkat polih pahpahan waris paguna kayan kemaon, ten pisan kangkat ngambil karang ayahan desa;
4. Yening wenten sentana luh ngelaksanayang lokikasanggraha (nyilih polah) mewastu madrebe pianak kewastanin sentana alpaka guru;
5. Yan anak ipun keakuin ring penglingsirnya, kengin pianak punika ngewaris paguna kayan reramane luh kemawon;
6. Sane kangkat ngewaris paguna kayan :
  - ha. Balu luh;
  - na. Balu muani sane mawit saking mawiwaha nyeburin;

- ca. Sang mulih deha, seantukan ring pawiwahane dumun sampun kaucap ninggal kedaton.
- 7. Sekantune maurip ipengelingsir kangkat ngewehin jiwa dana tatahan, utawi bekel maka cihnapaweweuh ring pianake sane mawiwaha.

#### Pawos 94

Prade sejeroning keluarga wenten ahli waris langkung ring adiri, patut :

- ha. Kawentenang paigum indik pedum waris inucap;
- na. Yening tan presida katunasang tatimbang ring Bandesa;
- ca. Prade tan wenten taler nganutin penepas Bandesa, kengin nunasang ring sang wenang rumawos.

#### Pawos 95

Karang ayahan desa kaputungan ahli waris patut kparidabdab desa adat, prade tegteg nenten wenten kayun ngalinggihin, karang inucap mawali ka desa.

### **Palet 10 Indik Panyanggran Banjar**

#### Pawos 96

- 1. Krama Desa Adat Sangkanbuana sane nangun yadnya ala utawi ayu kengin nunas pitulung majeng krama utawi krama desa adat karihinin antuk wenten pisadok sakeng aduwe yadnya majeng prajuru;
- 2. Yadnya merupa karya kelayusekaran utawi pitra yadnya, patut karombo olih krama banjar manut kabuatan ;
- 3. Krama utawi Krama Desa sane nunas pitulung ngrauhang panyanggra malarapan antuk pacanangan.

#### Pawos 97

- 1. Sahananin parikrama adat, agama, lan budaya sane kamargiang olih Desa Adat Sangkanbuana tan kapatutang wenten panyanggra lanjaran tur tan kangkat wenten ngalanjar;
- 2. Sang mururug kecap (1), kebaosin tur keni pamidanda manut pararem.

**SARGAH VI  
SEKRETA TATA PALEMAHAN**

**Palet 1  
Karang, Tegal, Carik, miwah Setra**

**Pawos 98**

1. Tanah pakarangan desa utawi tanah pumahan, patut wenten ngayahang;
2. Tanah manut angka 1 kangkat kapetimbang malarapan putusan sangkepan;
3. Tanah pakarangan sane katinggal camput kadruwe desa adat tur kawigunayang manut pabuat.
4. Tanah pekarangan padruwen desa sane katinggal sangkaning wusan makrama kabanggiang masengker 2 warsa.
5. Tanah manut angka 4 lintang 2 warsa mawali kadruwe desa adat tur kawigunayang manut pabuat kaputusang jeroning sangkepan;
6. Tanah pekarangan padruwen desa kangkat kawarisang sakantun sang ngawarisang kantun murip tur kantun tegteg makrama;
7. Karang, tegal, carik, patut sekadi ring sor :
  - ha. Wenten wates;
  - na. Mapemedal ka rurung utawi ka margi;
  - ca. Wenang kewehin sombah, utawi penguras toya;
  - ra. Maguna saha tan ngawinayang keduhkitan.
8. Wates karang nepi margi utawi ulu, utawi tanpa panyanding, patut kadabdabin olih sang aduwe karang, tur tan kangkat ngalahlah.
9. Sang mabukti ngalahlah, patut katiwakin danda manut pararem, minakadi:
  - ha. Ngewaliang tanah sane kelahlah;
  - na. Ngewehin prabiya sekadi patut;
  - ca. Yan sane kalahlah marupa genah sane suci krama inucap keni pamidanda pangupakara manut tatacara agama.

**Pawos 99**

1. Krama Desa Adat sane sampun ngeraksa karang desa niri tan kapatutang nunas karang desa, ngangkep karang desa;
2. Sang nglinggihin karang desa patut ngawigunayang karang manut cacukuh.

**Palet 2  
Indik Wawangunan**

**Pawos 100**

1. Krama tan kepatutangmekarya wewangunan nyapcap ke pakarangan sios;
2. Makarya rurung linggah ipun kepatutang adepa agung, adepa belah, utawi adepa;

3. Rurung sane katangun kadasarin paigum sang aduwe tanah lan sang sane pacang ngawigunayang tur kasobyahang jeroning pasangkepan;
4. Tan kepatutang ngenahang barang padruwen, ring margi utawi rurung Desa Adat Sangkanbuana lintang kalih dina;
5. Margi sane wenten ring wawengkon Desa Adat Sangkanbuana, kepatut polih pitulung pamiara karesikan olih krama Desa Adat Sangkanbuana,
6. Tan kapatutang ngewentenang wewanganan sajeroning kakuwub margi;
7. Krama Desa Adat Sangkanbuana sane pacang mapetimbang tanah patut masadok tur pastika molihang uwak-uwakan Bandesa utawi prajuru;
8. Krama dura Desa Adat Sangkanbuana sane mapatimbang tanah ring wawidangan Desa Adat Sangkanbuana patut malarapan saha uning Bandesa lan prajuru;
9. Wawanganan sane tan nganutin tata ngawangun lan tata ngawigunaang genah, jantos nyayubin bilih-bilih tembok ring telenging wates, risampun kawara tur sampun kasadokang wenang kapidanda manut pararem;
10. Nenten dados ngwangun banjar lan setra anyar ring wawidangan Desa Adat Sangkanbuana;
11. Sang piwal manut angka (1) rauh angka (9), patut kebaosin lan kenipamidanda manut perarem.

### **Palet 3 Indik Wawalungan**

#### **Pawos 101**

1. Krama Desa Adat Sangkanbuana sane maubuh-ubuhan, ubuh-ubuhan nyane patut kadabdabin mangda ngawinang rena;
2. Sang aduwe ubuh-ubuhan sane ngawetuang baya, sengkala, usak utawi leteh, cemer, patut nanggung prabea.
3. Tan kapatutang maboros, mabedilan, ngarereh ulam ring wawidangan Desa Adat Sangkanbuana, sajabaning sampun polih wak-wakan Bandesa utawi prajuru.
4. sang mamurug manut angka 31 patut kadanda manut pararem;
5. Tan kawenang ngenahang utawi negulang ubuh-ubuhan ring:
  - ha. Wawidangan parahyangan;
  - na. Dura tegalan, carik, utawi teba;
  - ca. Wawidangan setra.

### **Palet 4 Indik Kakayonan**

#### **Pawos 102**

1. Nandur tanem tuwuh mededampingan genah parahyangan utawi paumahan, paembang ipun saking panyengker ka jero pinih kidik adepa agung;
  2. Kakayonan sane kapitahen pacang mayanin, kangkat katundung.
-

3. Sang aduwe taru katundung patut muputang.
4. Taru ngawetuang baya, puluk katanggung olih sang aduwe taru;
5. Tan sida ngembasan pamargi nganinin wicara manut angka 1 ngantos 4, Bandesa lan prajuru tedun ngarauhang panepas, tur panepas suka tan suka antes katampenin;
6. Taru sane ngawinan baya, sang aduwe taru patut mrabeanin sategepne;
7. Tan kapatutang nebebeb utawi ngebah taru ageng wiadin sane kasinanggeh mabuat wigunannia manut kawerdian lingkungan, sadurung polih uwak-uwakan saking prajuru desa, manut paiguman Krama Desa Adat;
8. Krama desa patut ngamanggehang kawentenan reresikan tanem tuwuh sane ngawinang desane asri, tur lestari luire :
  - ha. Tanem tuwuh sane katandur utawi kapiara antuk desa utawi banjar;
  - na. Tetamanan desa;
  - ca. Margi utawi rurung, tlajakan.
9. Sapa sira sane ngrusak tanem tuwuh ring ajeng wilangan 5, patut keni pamidanda manut pararem.

### **Palet 5 Kareresikan Desa Adat**

#### **Pawos 103**

1. Kramaa Desa Adat Sangkanbuana mangda tegteg miara karesikan, kaasrian wawidangan parahyangan lan palemahan, wenten tan wenten titah saking Bandesa utawi prajuru;
2. Krama, lan tamiu sane wenten ring waidangan Desa Adat Sangkanbuana patut stata nyagra kareresikan wawidangan;
3. Sahananin mis sane metu sakeng raga, wawidangan ngraga patut kadabdabin sabecik-becikne utawi kagenahang ring wadah mis sane sampun kasayaga;
4. Sahananin mis patut kapilah tur kawadah manut rupan nyane
5. Krama Desa Adat Sangkanbuana mangda matiteten ngangge plastik;
6. Warung, penggak utawi genah mautsaha patut nyayagaang genah mis manut papilahan;
7. Sahananin mis tan kapatutang kaentungang ka dura karang utawi tanah duwe, sajaba sampun maduwe genah mis sane sampun kapastika oleh desa;
8. Banyu, pamasuhan, yeh umbah-umbahan, yeh blengbeng utawi sakeluwr nyane tan kapatutang ngaromonin ka dura karang utawi tanah duwe;
9. Tan kapatutang mabacin ring jalinjing, telabah, utawi tukad;
10. Sang ngawigunaang toya jelinjing, telabah, utawi tukad, bilih-bilih angge masiram, mangda tegteg nyagra kasopanan;
11. Mis sane metu sangkaning upakara utawi upacara mangda kapuputang ring wawidangan genah ngamargiang upakara utawi upacara;
12. Sang sapa sira murug manut angka 1 ngantos 11 kakeninin danda manut pabuat.

**SARGAH VII**  
**WICARA, BHAYA, DUSTA, LAN PAMIDANDA**

**Palet 1**  
**Indik Wicara**

Pawos 104

1. Muncehang wicara patut malarapan Pararem Tata Cara Muputan Wicara
2. Sane patut mutusang pamunceh wicara ring Desa Adat Sangkanbuana, inggih punika Prajuru Desa Adat ring jeroning sangkepan utawi paruman;
3. Pamutus pamunceh wicara mangda nganutin daging awig-awig, petitis lan pamikukuh Desa Adat Sangkanbuana, lan ilikita guru wisesa sane wenten paiketan nyane;
4. Satunggil wenten wicara, wicara karerehang pamunceh oih Bandesa lan prajuru karampih oih kerta desa.
5. Pamutus pamunceh wicara tegteg ring jeroning sangkepan utawi paruman.
6. Prade nenten molihang pamutus wicara, wicara katunasang pamunceh ka Majelis Desa Adat manut undagan.

Pawos 105

1. Sehananing wicara mapai ketan agama, adat, patut kebawosin oih Prajuru Desa Adat karampih Kerta Desa, tur keni pamidanda manut pararem;
2. Krama Desa Adat Sangkanbuana mewicara nyewenggara wiadin ngawentenang bawos kawon, ngemetuang manah sungsut patut kebawosin oih klian banjar adat utawi Bendesa Adat;
3. Pamutus pamuput wicara patut pastika nyantenang iwang utawi lempas daging awig-awig Desa Adat Sangkanbuana.

**Palet 2**  
**Indik Bhaya miwah Dusta**

Pawos 106

1. Pabuat tan rahayu utawi ngawinang pikobet, duhkita, duskerta raga utawi jadma siosan kasinanggeh bhaya;
2. Bacakan sane kabawos bhaya, luire:
  - ha. Jiwa bhaya : kaamuk, kabaak, lan kaparikosa;
  - na. Artha bhaya : kamalingan, kabegalan;
  - ca. Geni bhaya : katunuan utawi puun;
  - ra. Toya bhaya : anyud ketiben arus;
  - ka. Bhayu bhaya : katiben linus.
  - da. Dura cara agama:

Pawos 107

1. Krama Desa katiban bhaya, mangda digelis atur supeksa majeng prajuru utawi sang wenang memaosin;
2. Krama Desa uning sane ngawinang bhaya, patut digelis atur supeksa majeng prajuru utawi Guru Wisesa;
3. Krama sane ketiban bhaya ageng, sang amangguh digelis nepak kulkul cihna bhaya tur atur supeksa majeng prajuru utawi sagelisne nunas pitulung;
4. Krama sane nyingak utawi mireng kulkul cihna bhaya patut sayaga mapitulung ngeromba saha makta gegawan,
5. Krama patut ngeromba sang keni bhaya manut duhkitannyane tur sih dana miwah siyosan manut kewentenan sang kahanan bhaya.

Pawos 108

1. Maseserep utawi ngeledahin ritatkala wenten kemalingan, patut malarapan panguak Prajuru utawi Klian Banjar;
2. Maseserep ka seos bebanjaran utawi Desa, patut polih panguak Prajuru utawi Klian Banjar wiadin Bandesa;
3. Prajuru patut nuntun tingkah maseserep.

Pawos 109

1. Sang melaksana dusta, sang ngawinang baya mabukti kadanda, ngalantur ngamargiang pamutus karma wasana;
2. Sang mayanin, ngrusak utawi ngemaling druwe kesinanggeh suci, pamidanda patut maweweheh penyanggaskara manut sastra agama ;
3. Krama Desa Adat Sangkanbuana mangda sumeken ngamargiang tata-titi pamargin agama manut catur dresta Bali.
4. Dusta saking dura Desa Adat Sangkanbuana, sida katangehan kasadokan majeng sang wenang tur naur panuku wasana pabuat nyane;
5. Krama utawi tamiu sane ngumam-ngumam ring wawidangan Desa Adat Sangkanbuana kadanda manut pararem.

**Palet 3**  
**Indik Pamidanda**

Pawos 110

1. Desa Adat Sangkanbuana, wenang nibakang pamidanda majeng krama sane sampun mabukti nglempasin daging awig-awig;
2. Pamidanda katiwakang oleh Bandesa utawi prajuru jeroning sangkepan utawi paruman.
3. Patetiwak pamidanda kelaksanayang olih bandesa utawi Prajuru Desa Adat Sangkanbuana;
4. Bacakan Pamidanda:

ha. Panca pamidanda :

- (1) Tulak mincir, manut pararem;
- (2) Pangererenga, manut pangelokika pekaryan;
- (3) Melencerin, manut sekadi dosan mekarya apisan;
- (4) Penyagsag wirasa, manut pemargi dedosan mekarya pang kalih;
- (5) Angrugada Klian keni danda manut pararem.

na. Pamidanda siwosan:

- (1) Ayah-ayahan penukun kasisipang;
- (2) Danda arta (dedosan saha panikel-nikelan nya, utawi panikel paturunan);
- (3) Pangupakara lan pengaskara;
- (4) Rerampagan (melelang);
- (5) Ngewaliang tanah karang desa ;
- (6) Kasepekan;
- (7) Kanorayang.
- (8) Ngelad pipil

ca. Agung alit pamidanda manut daging pamutus paparuman.

5. Jinah utawi raja brana saking pamidanda manados druwen Desa Adat Sangkanbuana.

#### Pawos 111

Krama Desa Adat Sangkanbuana tan nawur paturunan, paputran utawi dedosan risampune rauh panemayannia patut keni panikel manut pararem.

#### Pawos 112

1. Krama desa sane ngeseng (nenten pitra yadnya) utawi mendem sawa ring genah tan kapatutang keni pamidanda manut pararem saha nglaksanayang pamarisudha desa manut pituduh sang ngawiwenang tur sawa inucap kaanutang genahne;
2. Krama sang rumaga putus utawi sampun madwijati, pitra yadnyan nyane kamargiang manut dresta, prade piwal patut kabawosin;
3. Krama sane makarya bangbang pacang nandur kekayon kirang adepa agung patut keni pamidanda manut pararem saha pramangkin ngurug bangbang;
4. Krama sane ngutang luwu, wangken wawalungan miwah kotoran sane siosan ring margi agung, got miwah genah sane tan manut, kapidanda manut pararem;
5. Sahananing sane kausak olih wong edan, sahananing sane kausak inucap patut kategenang manut pabuat olih kapatutan sang wong edan;
6. Krama utawi tamiu sane marebat ring wawidangan Desa Adat Sangkanbuana wenang kadanda manut pararem;
7. Krama utawi tamiu sane ngamuk ring wawidangan Desa Adat Sangkanbuana wenang kadanda manut pararem;
8. Krama sane cuntaka yening ngranjing ke pura patut keni pamidanda manut pararem, saha ngamargiang panyapuhan pamrayascita;

9. Krama utawi tamiu sane masang pangalah dewa, mendem sahanan rarempon sarwa leteh ring Pura patut keni pamidanda manut pararem saha ngwentenang panyapuhan;
10. Sang nampi jadma madunungan ring wawidangan Desa Adat Sangkanbuana tanpa t masadok majeng prajuru napi mapih kasinanggeh dusta, sang nampi keni pamidanda manut pararem;
11. Krama Desa Adat Sangkanbuana sane manggihin sang nglempasin awig-awig, prade tan nyadokang, krama inucap keni pamidanda;
12. Sahanan pamidanda patut ngangge gaguat utawi uger-uger manut pararem.

**SARGA VIII**  
**NGUWAH-NGUWUHIN AWIG-AWIG**

Pawos 113

1. Nguwah nguwuhin awig-awig kelaksanayang jeroning Paruman Krama Desa Adat Sangkanbuana;
2. Perareman manut angka 1 malarapan gilik saguluk Krama Desa Adat Sangkanbuana;
3. Pamutus bebwosan malarapan gilik saguluk utawi kengin mejalaran pasuaran (wewilangan suara) sanistanya apahan, lintang asiki.

**SARGA IX  
SAMAPTA**

**Pawos 114**

1. Awig-awig puniki kewastanin Awig-awig Desa Adat Sangkanbuana, Kecamatan Klungkung, Kabupaten Klungkung, Provinsi Bali;
2. Awig-awig puniki kemargiang ngawit keraremin olih Krama Desa Adat Sangkanbuana jeroning paruman;
3. Awig-awig Desa Adat Sangkanbuana sane rihinan kadaut tur sapulukne kamargiang awig-awig puniki
4. Awig-awig puniki manggeh kalih kelaksananyang ring wewidangan krama lan Desa Adat Sangkanbuana;
5. Awig-awig puniki nganinin krama lan krama Desa Adat Sangkanbuana, lan sehanan sane kekuwub olih Desa Adat Sangkanbuana.

**Pawos 115**

Saluiring pamargi pakraman sane durung muggah, manggeh kelaksananyang manut tata cara sane sampun ketah memargi, kedulurin antuk pasuaran/pararem.

**Pawos 116**

1. Awig-awig puniki kalinggatanganin olih Bandesa, Prajuru Desa, Klian Bajar Adat ngangganin krama Desa Adat Sangkanbuana;
2. Awig-awig puniki kasurat, kararemin tur kamanggehang duk rahina Wrapsati Umanis Kulantir, Pananggal 1 Kawulu 1945, Wrapsati, 11 Januari 2024 , ring Desa Adat Sangkanbuana;
3. Luwir sang sane ngalinggatanganin:
  - ha. Krama Desa Adat Sangkanbuana kasurat ring lepihan;
  - na. Prajuru Desa Adat Sangkanbuana.

Bendesa Adat Sangkanbuana,

Penyarikan,

   
I WAYAN SUDIANA URIP I MADÉ AGUS PUTRAWAN

 I NENGAH YOGA SEDANA

Petajuh,

 I KADÉK MERTA YASA

Petengen,

Klian Banjar Adat Sangkanbuana,

1. I GEDÉ WARSANA

2. I KETUT GUNAWAN

Klian Banjar Adat Pegending,

1. I KOMANG SUBAGIA

2. I KOMANG ASTIKA

3. I GEDÉ WANAPRASTA

3. I NENGAH KICÉN.

Pangrampih,

Majelis Désa Adat (MDA)  
Kabupaten Klungkung  
Bendesa Madya,



DÉWA MADÉ TIRTA,  
S.Pd.,M.Pd.

Majelis Désa Adat (MDA)  
Kecamatan Klungkung  
Bendesa Alitan,





Telah Dicatatkan

Pada Dinas Pemajuan Masyarakat Adat Provinsi Bali

Tanggal : 16 Februari 2024 .....

Registrasi Nomor : A/0003/1385/051/08/DPMA/2024 .....

Lepihan  
Bacakan Krama Désa Adat Sangkanbuana